

author: Duroni, Giovanni  
title: Scrittura doppia! : commedia in 4 atti  
shelfmark: COLL.IT.0008/0011/03  
library: Biblioteca nazionale Braidense - Milano - IT-MI0185  
identifier: MIL0655431

Le riproduzioni digitali accessibili dalla Biblioteca digitale italiana di [www.internetculturale.it](http://www.internetculturale.it) sono per la maggior parte di dominio pubblico, e provengono dalle attività di digitalizzazione realizzate dalle biblioteche che possiedono gli originali e la proprietà delle riproduzioni digitali, e sono istituzioni partner del portale.

La riutilizzazione non commerciale è libera e gratuita nel rispetto della normativa vigente.

Ai fini della riutilizzazione commerciale e/o per ottenere un documento ad alta definizione contattare il detentore dei diritti del bene digitale utilizzando nel Download del documento, il contatto di posta elettronica.

Gli utilizzatori finali dei beni digitali, sia che riproducano parzialmente o completamente le immagini, dovranno sempre e comunque citare la fonte [www.internetculturale.it](http://www.internetculturale.it)

.....

The digital reproductions accessible from the Italian Digital Library [www.internetculturale.it](http://www.internetculturale.it) are mostly of public domain, and come from the digitization activities carried out by the libraries that own the originals and are ownership of digital reproductions, and are Institutions partner of the portal.

The non-commercial re-use is free in accordance with the local regulations.

To allow commercial reuse and/or to obtain a high-definition document please, contact the copyright holder of the digital object using the contact e-mail you can find in the Download of the document.

The terms of use of the Internet Culturale material states that the final users that reproduce images or part of them must mention the source [www.internetculturale.it](http://www.internetculturale.it)

1.23/1/79 2. All. N. Agnelli  
Di. H. L. Costa 24/11

REPERTORIO  
DEL  
TEATRO MILANESE

SCRITTURA DOPPIA!

Commedia in 4 atti  
DI  
G. DURONI

MILANO  
CARLO BARBINI EDITORE  
Via Chiaravalle, 9.

CONT  
1  
8  
11

Fasc. 103

Prezzo Cent. 35

[www.internetculturale.it](http://www.internetculturale.it)

# REPERTORIO DEL TEATRO MILANESE

---

Fascicolo 103.

# SCRITTURA DOPPIA!

COMMEDIA IN 4 ATTI

DI

**G. DURONI**



MILANO  
Presso • CARLO BARBINI • Editore  
Via Chiaravalle, Num. 9  
1879.

GR

La rappresentazione di questa produzione è sottoposta al disposto dell'art. 13 della Legge 25 giugno 1865, N. 2337, ed all'art. 22 del relativo Regolamento 13 febbrajo 1867.

---

*Questa produzione è posta, per quanto riguarda la stampa, sotto la salvaguardia della legge 25 giugno 1865, N. 2337, quale proprietà dell'Editore CARLO BARBINI.*

SCRITTURA DOPPIA !

---

Tip. Gius. Goffo, via S. Pietro all'Orto, 23.

## PERSONAGGI

---

Carlo.

Teresa, sua sorella.

Salvator, fidanzato di Teresa.

Carmelina, vicina di casa.

Cav. Onori, negoziante di sapone.

Erminia, sua seconda moglie.

Enrichetta, figlia del primo letto di Onori.

Steven, promesso di Enrichetta.

Robert, giovine di studio di Onori.

Guglielmo, servo di Onori.

Un Notaio.

---

## ATTO PRIMO

---

Modesta camera in casa di Carlo — Porta comune nel mezzo, una a destra ed una finestra a sinistra che dà sulla strada — Varie sedie di modesta apparenza — Tavolino da lavoro — Una scrivania. — Un portamantelli, ecc.

### SCENA PRIMA.

#### Carlo e Teresa.

*(Teresa sta seduta davanti al tavolino da lavoro, e Carlo in piedi davanti a lei con un libretto della Cassa di Risparmio in mano).*

Car. Teresa, cent lira ancamò e poeu la miseria, la miseria, te capisset?

Ter. Car el mè car fratej, perchè te se casciet? Te voeu propri che la Provvidenza la me abbandona?

Car. E s'el fuss insci?

Ter. *(deponendo il lavoro)* Te see propri cattiv.... Come te see facil a perd la fed! Duu ann fa, dopo ch'è mort i noster gent, la Provvidenza l'ha forsi minga pensaa per nun?

*Car.* Sì, ma te seret ti sola la favorida, e ti invece te voruu che ne approfittass anca mi...

*Ter. (riprendendo il lavoro indispettita)* Torna minga de cap.... fa piasè parlem pù in quella maniera!

*Car.* Sì, ma l'era la toa dota che hoo consumaa?

*Ter. (si alza con dispetto)* Te torni a di' de finilla! Se el Salvator el me voeur ben, el me sposarà anca senza dance. La mia povera maestra quand l'è morta lassandem a mi i sò risparmi, la m'ha ditt quasi cont on cerin rident che avess de doperai in d'ona bonna occasion. Donca me par che pussee bonna occasion de questa de ajutà mè fradell...

*Car.* Ma, cara Teresa, l'è ben che in quell cerin quasi rident de la povera moribonda se doveva capi che l'occasion pussee bonna la doveva vess quella de quand te capitava de toeu mari.

*Ter.* Bella pretenzion de vorè savè cosse la pensava quella povera donna!

*Car.* T'ee bell pari a di' quell che te voeu, ma mi g'avaroo semper el scrupol de avè vivuu ai tò spall... Maladetta l'ora che m'è vegnuu in la ment de scriv di vers! Maladetta la prima volta che me sont miss a schizza ona caricatura!... L'era mei che me fuss dedicaa a

la scienza di numer, a la scrittura doppia... e che avess tralassaa almen a soldaa de fa di asnad.... Cosse se acquista a fa del spirit foeura de post: ona strascia d'ona caricatura del coronel e on scherz all'aiutant maggior, e addio carriera! l'è andada in fumm. E intant l'è sès mès che sont a casa e on strase d'on post hoo anmò de podè trovall; e intant sont chi a fa nient e a viv ai tò spall! (*battendo una mano sul libretto*).

*Ter.* Per la memoria de la nostra povera mamma, adess te vòsi adree sul seri! L'è minga vera che t'ee faa nient, perchè dopo che te see a casa de soldaa, t'ee studiaa tanto.... e mi hoo leggiuu, vèh, i bej robb che ti t'ee scritt!

*Car.* Bej?

*Ter.* Sì, e per quanto mi poda capi, te gh'ee di penser magnifich!

*Car.* Se anca el fuss vera, l'è minga assee.... bisogna avè studiaa seriament per no scriv di sproposit gross.

*Ter.* Ma, i racconti che t'ee stampaa sui giornai hin staa molto lodaa. «Patria e famiglia» han ditt tutti che oltre vess on bell racconto l'è anca on lavoro onest.

*Car.* Sì, ma te see cosse hoo guadagnaa? M'han faa ona caritaa a stampamel.

*Ter.* Andemm, fatt coragg.... te vedaree che sto

benedetto impiegh el trovaremm; s'è impegnaa tanti amis!

*Car.* Oh magari! me contentaria anca de fa el facchin de studi....

*Ter.* Quell poeu no!

SCENA II.

*Carmelina e detti.*

*Carm. (entrando)* Car i mè florasc, come vala? che novitaa gh'emm de jer a sta part? Mi già el savii che tutt' i dì voo minga foeura de cà prima de vegni a fav ona visita e se no ve cunti tutt' i novitaa che hoo savuu; già, scusee, l'è el mè caratter. La tòsa del padron de cà la fa spòs.... se dis che la toeu on fior d'on giovin impiegaa a la Cassa del Menicipi cont tre mila lir all'ann de soldo; ma disen ch'el sia propri on giovinotto pien de talent, che l'ha studiaa come se dev e che in d'on moment el s'è faa ona bella strada.... Scusee, vedii, l'è el mè caratter.... Disen poeu che se voeuren on ben, on ben....

*Ter.* Oh sura Carmelin, che bella roba!

*Car. (siede e abbandonando la testa fra le mani)* Tre mila lira de soldo, ona cà, ona spòsa e dopo ona famiglia..

*Carm. (volgendosi verso Carlo)* Oh guarda lì.... cosse gh'è adess?

*Ter. (piano)* Gh'è che quand el sent di bonn notizi che riguarden i alter, el se rattrista semper.

*Carm.* Oh tella!... Scusee, l'è el mè caratter.... Ma mi hoo faa per vegni sul discors del tò d'on matrimoni, mia cara Teresa; ma te see no che tutt' i sir, prima de andà in lett, disi semper tre avemarij a santa Tecla per fa che l'abbia de andà prest a soldo....

*Ter.* Sura Carmelina, la me faga piase a vegni de là in la mia stanza che g'hoo de di' ona robba a proposit del mè matrimoni (*piano*) de già che sto argoment el ghe dà insci fastidi al mè Carlo.

*Carm.* Sì, andemm pur.... Pover giovin, ghe gira on poo la giricoccola!

SCENA III.

*Carlo solo, indi Carmelina e Teresa ancora.*

*Car. (scuotendosi)* Tre mila lir de soldo, ona tòsa che ghe voeur ben.... Quella sì se pò di' che l'è fortunaa! E a mi ona fortuna compagna la me toccherà minga.... Vegh ona tòsa che voeur ben, la dev vess ona gran conso-



lazion! Mi g'hoo semper denanz di oeuce quella bella creatura che hoo incontraa per quatter di de seguit in sul bastion... l'ultima volta che l'hoo incontrada i sò bej oggioni s'hin incontraa coi mè cont on'espression che el me parsa finna on salut.... Ma perchè ghe sont minga andaa adree per vedè in dove la stava de cà? Bravo, per che scopo, poeu.... sont in càs mi de abandonamm a sti penser?... Pensa prima a trovà la manera de viv, de lavorà, se de no qualunque sentiment te toccherà de soffogatel dent de ti (*batte col pugno sul tavolo*).

*Carm. (seguita da Teresa)* Mi sperì che quell bon fioeu el sarà content. Del rest discorra-remm on'altra volta; adess g'hoo famm e bisogna che vaga (*vedendo Carlo nella posizione di prima*) Ma che diavol d'on giovin! Ma disì, ej, sur Carlo, coss'hin sti malinconii? L'hoo mai veduu tant allegher l'è vera, ma cont la cera insci scura compagn d'incoeu poeu, l'hoo mai vist!

*Car. (alzandosi)* Che la seusa, sura Carmelina (*le stringe la mano*) l'è che incoeu g'hoo di brutt penser pussee del solit (*riprende il libro della Cassa di Risparmio*) Ancamò cent lira e poeu la mancanza de tutt, la capiss, sura Carmelin... e sti cent lira chi hin i ultim de

quella poca ereditaa che l'ha faa quella povera tòsa lì de la soa maestra.

*Ter. (a Carmelina)* Ma insomma, che la me aiutta lee a faghela feni.

*Carm.* Ma sì, ma s'el soo; tra fratell e sorella hin delicatezz (*li prende per mano*) Scusee, l'è el mè caratter.... Vegnii chi, fee la pàs; speremm che on quai benedetto di el trova-remm sto impiegh al Governo o al Menicipi: gh'è tanti asen impiegaa là insci, han minga de impiegall lu che l'è on fior d'ona crapetta? E allora el guadagnarà e el podarà pagà el sò debit a soa sorella. Va ben, Teresa?

*Ter.* Insci el g'avarà pu de scrupoi.

*Car.* Teresa... (*stringendole la mano*).

*Carm.* Insci va ben, bravi, ma diavol! tra fradell e sorella ghe dev vess semper avert el liber del dare e dell'avere.

*Car.* (Dare e avere l'è la scienza che avaria dovuu imparà a qualunque costo quand hoo dovuu lassà la carriera militar, e minga vorè fa el letterato de strapazz!)

*Carm.* Andemm, andemm, su allegher e femmes spirit, che se poeu sto impiegh el trova-remm minga subit, ch'el creda minga de fa ona figura lassandem pensà de mi ai sò bisogn; quand el sarà a post el me restitirà quell poch che podaroo avegh imprestaa!

## SCENA IV.

## Salvator e detti.

Sal. (con un pacchetto) Vegni innanz.

Carm. Oh bravo, l'è vegnuu propri a temp per ajutamm a vosach adree chi al sur Carlin, che incoeu l'è d'on umor de fa vegni su la pell de capon. Mi e la Teresa semm minga staa in càs de fall indrizzà.

Sal. De bon? (con intenzione) Voeuren vedell a fa el cerin de rid? (Carlo presta attenzione).

Ter. (con premura) El g'avaria ona quai novitaa per l'impiegh?

Car. Davvera?

Carm. Per l'impiegh?

Sal. Oh no, pur tropp, l'è minga de quell che se tratta.

Car. Ma....

Sal. (mostrando il pacchetto) L'è de quest che intendi de parla.

Car. Del mè liber?

Sal. Quell professor amis del mè pover papà, el m'ha ditt che l'ha leggiuu attentament, e el m'ha daa on giudizi che m'ha faa propri piase.

Car. (con gioia) Sì? E cosse l'ha ditt?

Sal. Molto ben in general.

Car. (con grande interesse) Sì, e....

Sal. E in particolar el dis che i question hin tratta dal punto di vista giust, ma che gh'è di diffett e di arditezz che guasten el concett general (gli dà il pacchetto) Eppoeu, toeu, guarda ti i sò osservazion c' hin segnaa con lapis in margin.

Car. (gli stringe la mano) Grazie, car el mè Salvator!

Carm. (Sì, ma l'è minga on impiegh).

Ter. Te vedet, Carlo, che te dubitavet del tò talent?

Sal. Sent, Carlo, se fuss in ti me mettaria adree subit a fa qui correzion che l'ha segnaa el professor.

Car. (con premura) Ma sì, me metti adree subit (siede al tavolino).

## SCENA V.

## Cav. Onori e detti.

Ono. (entrando) Al prim pian m'han ditt che chi ghe dev sta on certo Carlo Gualdi.

Ter. Sissignor, el sta chi (Carlo si alza).

Sal. Carlo, sto scior chi el te cerca ti.

Car. (*inchinandosi*) Riverisco....

Ono. L'è lu el sur Carlo Gualdi?

Car. Sì, signor.

Ono. (*guardando Teresa*) Che bella tòsa, m'han minga ingannaa! Ch'el disa, bell giovin, hin tutti de la soa famiglia sta gent chi che vedi?

Carm. (Che curios!)

Car. Ch'el scusa, capissi minga....

Ono. Cont che diritto foo tutti sti domand, eh? Ma ch'el g'abbia minga paura, che quand el savarà perchè sont vegnuu chi, el sarà content (*guardando furtivamente Teresa*) Che bella tòsa! (*prende una sedia e siede*).

Sal. (Che bell original!)

Ono. Donca, sur Carlo Gualdi, lu el cerca de impiegass?

Car. Comè, l'è per quell che....

Carm. (*a Salvatore*) L'è poeu minga tant anti-patich a guardagh polid.

Sal. Sì, l'è vera!

Ter. (*facendosi avanti*) Sì, l'è mè frateł ch'el cerca de andà a post.

Ono. (Che bell vosin!) (*leva dal portafogli un biglietto di visita e lo dà a Carlo*) Ch'el leggja.

Car. (*legge*) « Gioachimo Onori, fabbricatore di « sapone e negoziante all'ingrosso di prima « qualità.... »

Ono. Che sont mi.

Car. (*continuando a leggere*) « Possidente e Ca-  
« valiere. »

Ono. In virtù del mè savon. Donca, che senten (*gli prestano tutti attenzione — a Teresa*) Ma che la vegna chi attaccaa che la sentira polid anca lee.... (Che bej oggioni che la g'ha!) Donca, adess che san chi sont, ghe disaroo perchè sont vegnuu chi (*a Carlo*) L'altra sira me l'han raccomandaa perchè ghe trovass de mettel a post.

Ter. Che bravo scior, el s'è interessaa per mè frateł?

Car. L'è vera?

Carm. El dev vess insci già.... Scusem, l'è el mè caratter.... Perchè, se de no coss'el saria vegnuu chi a fa?

Ono. Chi l'è quella veggia barbottona lì ch'el pâr che la g'abbia tanta vòs in capitol?

Car. L'è ona vesina che l'è quasi ona nostra seconda mader.

Ono. (Ahi!)

Carm. (Veggia barbottona a mi? Se g'avess minga paura de portagh dann a quell fioeu lì, ghe la daria mi la veggia barbottona!)

Car. El g'avaria la bontaa de....

Ono. De feni el mè discors?

Carm. Domandi compermess che hoo de andà via.

Ter. La torna chi?

Carm. (piano a Teresa) Sì, l'è mej che vaga, perchè s'el me dis on quai alter pitetto, mi doo foeura; già, t'el see, l'è el mè caratter (fa un inchino goffo a Onori) Riverisco... (A mi veggia barbottona, brutt impiaster!) (via).

Ono. L'è minga mal quella soa seconda mader! Ma, tornemm a nun. Donca, la persona che me raccomanda de mettel a post, l'è ona persona che ghe podi negà nient: el professor Belcredi, on amis che m'ha faa tanti piase.

Car. (volgendosi a Salvatore) Oh bell!

Ono. Sigura, e on post per lu ghe l'hoo in la mia casa; e l'è semper stada la mia abitudin quella de andà in persona a tocu i informazion della gent che hoo fissaa de impiegà in di mè negozi.

Car. El fa benissim.

Ono. El soo anca mi. Donca quella veggia brontolona l'è ona specie de soa tutrice, quella tòsa lì l'è soa sorella e.... quell.... giovinotto lì l'è.... (accennando Salvatore).

Car. El spòs de mia sorella.

Ono. (lo guarda coll'occhialino alzandosi) L'è propri on bell giovinott e (guardando Teresa) robust. E dove l'è impiegaa?

Sal. Nell'Archivi Municipal, in dove hoo conossu el professor che g'ha raccomandaa el Carlo.

Ono. Oh bella! E quand l'è che se farà l'imeneo?

Sal. Appena che me mettarann a soldo.

Ono. (con malizia) E se voeuren ben?

Ter. (chinando la testa) Ma....

Ono. (Che bej cavej che la g'ha!) Donca (a Carlo) fradell e sorella cont on matrimoni in prospettiva.... va ben, ne soo tant che sia assee; mi sont on omm che ghe ved e sont pront com'el fulmin.... Donca lu cosse l'ha faa fina adess?

Car. Sont staa soldaa.

Ono. L'è tanto temp che l'è a casa?

Car. Sés mès.

Ono. L'è bon de sta ai liber?

Car. On poo....

Ono. Comè on poo? El conoss minga la scrittura doppia?

Ter. Ma mè fradell, foo minga per di', l'è on giovin de talent e l'impara prest.

Ono. Quand le dis lee che l'impara prest.... vedaremm (sempre a Carlo) L'è bon de tegnì la corrispondenza?

Car. Me ingegni a scriv.

Ono. Comè, el se ingegna a scriv! Ma chi l'è che al di d'incoeu è minga bon de scriv? gh'è scoeul e maester a mucc! Me doo d'intend de di' se l'è bon de scriv cont la solita

manera all'uso commercial: A pregiata vostra del sedici corrente, ecc., ecc.

*Car. (mortificato)* Impararoo subit.

*Ono.* Anca quest l'ha de imparà?

*Ter.* Oh l'impararà prest!

*Ono. (guardando Teresa)* Se lee la dis che l'impararà....

*Sal. (Pover Carlo!)*

*Ono.* E come stiamo di lingue? El sa el frances?

*Car.* On poo....

*Ono.* Ma, in piasè, cosse l'è bon de fa? Che impiegh el voeur trovà se l'è bon de fa nient?

*Car.* Ma cont la bonna volontaa....

*Ter.* Sigura, la bonna volontaa....

*Ono.* Sia la bonna volontaa.... (Come sa fa a transig minga cont on giovin che g'ha insci ona bella sorella!) Ben, lu l'è bell' e che a post; el vegnarà in del mè studi, ghe faroo fa la piazza.

*Car.* Grazie.

*Ter.* El vedarà ch'el sarà content del mè fradell!

*Sal.* L'è perchè l'è tropp modest, ma el vedarà ch'el farà tutt polid.

*Ono.* Speremm ben! (*a Carlo*) In quanto alla mesada vedaremm dopo un mês de proeuva.

In del mè studi bisognerà obbedi prima a mi, che sont el padron titolar e di fatto, e poeu quanto prima a mè gener, on fior d'on giovin ch'el g'ha del ben di Dio al sò, e ch'el dev spòsà la mia tòsa, unica e sola, appena che la tornarà indree di bagn cont mia miee. Donca, s'el voeur vegni, vemm defilaa al mè studi e mi l'installi adirittura.

*Car. (mettendosi il cappello)* Vegni subit!

*Ono.* Bella tòsa, la saludi!

*Ter.* Ch'el ciel el ghe daga del ben per la bonna azion ch'el fa!

*Ono.* Donca andemm (*maliziosamente*) Quell giovinotto lì el se ferma?

*Sal.* No, no, vegni (*a Teresa*) rivederci stassira (*si dispone a seguire Carlo e Onori*).

*Ter.* Ma, Carlo, ma t'ee nanmò de fa colazione stamattina.

*Car.* Fa nient, g'hoo minga famm.

*Ono. (a Teresa)* Che la staga ben, bella tòsa! (*via con Carlo e Salvatore*).

SCENA VI.

*Teresa, indi Salvator.*

*Ter. (mettendosi a lavorare)* Pover Carlo, come l'è restaa mortificaa! Ma g'hoo paura ch'el sia minga bon de resist ai umiliazion ch'el po-

darà minga schivà, tanto pu che me pâr che quell scior lì el sia puttost on rustegott.... Ma, speremm ben! Ma el pover Salvator che l'era forsi vegnuu chi per dimm on quaicoss, e l'è andaa via insci.... oh ma el tornarà chi stassira.

*Sal. (entrando)* Teresa!...

*Ter. (sorpresa si alza e depone il lavoro)* Che novitaa l'è questa? L'è minga andaa all' ufizi?

*Sal.* Minga nanmò, come la ved; g'aveva tanti robb de digh....

*Ter.* Ma l'è che semm chi de per nun.... e.... voraria minga che i vesin de la porta avessen de parlamm adree.

#### SCENA VII.

#### Carmelina e detti.

*Carm.* No, perchè sont chi mi a fa la guardia d'onor.

*Ter. (alzandosi)* Oh sura Carmelina!

*Carm.* Già, mi che me regordi semper de quell che m'ha raccomandaa la toa mamma. Quella povera tòsa lì, la m'ha ditt, ghe resta indree pu nissun de guardagh adree; me raccomandi a lee. E mi g'hoo rispost: cara la mia Maria,

ma hin discors quisti chi? el pâr che la sia adree a mori.... E l'era adree a mori de bon, povera donna! (*si asciuga una lagrima*).

*Ter. (piangendo)* Povera mamma!

*Sal.* Ma, sura Carmelina! semm appenna on poo content perchè el Carlo l'ha trovaa de andà a post, che lee la me ven chi a regnamm ancamò la malinconia.

*Carm.* Mi soo minga cosse di'.... Già, scusee, l'è el mè caratter.... Se mi hoo tiraa a man quella povera donna, l'è staa per fa vedè i mè diritti e i mè dover de sentinella morta in sta cà chi. (*a Salvatore*) Mi soo benissim che lu l'è on bravo giovin incapace de fa ona furfantaria cont sta tòsa chi; ma i vesin de la porta, el sa, nèh! gh'è di lengu che taja el fer, e mi vuj minga che parlen sul cunt de la mia Teresa.

*Sal. (serio)* Allora mi andaroo via senza di' el perchè sont torna chi.

*Ter.* El va via?

*Sal.* Se foo parlà i vesin de la porta?

*Carm.* No, perchè ghe sont chi mi; se quaichedun l'ha veduu a tornà chi m'avaràn veduu anca mi, e san ch'el tesor l'è custodii a vista. Donca lu el pò restà cont tutt sò comod, e per provà che mi de lu me fidi, i lassi chi de per l'è e mi voo là in la stanza de

la Teresa a mett insemma quatter copon che g'hoo de andà a scoeud (*porgendo la mano a Salvatore*) Ch'el staga chi, ma giudizi, nèh! (*andando via*) Ma già, ch'el seusa, l'è el mè caratter....

## SCENA VIII.

## Teresa e Salvatore.

Sal. Dopo tutt l'è ona gran bonna donna.

Ter. (*siede e riprende il lavoro*) Oh sì, propri bonna.

Sal. (*sedendo dall'altra parte del tavolo*) Donca, Teresa....

Ter. Coss'el g'ha?

Sal. (*giuocando colla forbice*) Incoeu ai quatter voo de mia sorella Letizia.

Ter. Ma ch'el lassa sta la forbesetta, ch'el se farà mal.

Sal. La sa, vera, che mia sorella la m'ha promiss de fagh la schirpa...

Ter. Ma ch'el guarda ch'el me ingarbia tutt' i filzoeu de seda....

Sal. Ma, Teresa, perchè la cambia discors? Mi g'hoo bisogn che la me disa quand l'è che la ghe mandarà la tila; e poeu, nèh, bisogna mandagh anca de la palpignana perchè la vœur

famm di giponitt piscinitt per... per... la me capiss, eh?

Ter. Ma che discors ch'el fa adess? Ma gh'è temp! Ch'el lassa prima vedè s'el Carlo el restarà a post.

Sal. Ma quest chi el ghe entra nient cont el comprà la tila; adess mia sorella la g'ha nient de fa....

Ter. (*deponendo il lavoro*) Ch'el senta, Salvatore, coss'el g'ha ditt che g'aveva de dota mè fradell?

Sal. Pussee de mila lira.

Ter. (*alzandosi*) E quanto temp l'è che ghe l'ha ditt?

Sal. Quand hoo cercaa de spòsalla.

Ter. Che l'è quasi on ann.

Sal. Sì....

Ter. Ch'el senta, Salvatore, mi ghe devi fa ona confidenza....

Sal. (*sorpreso*) Ona confidenza?

Ter. Sì.... quj dance mi ghi hoo pù.

Sal. Ghi ha pù?

Ter. Car Signor! el capirà ben che mè fradell, de dopo che l'è vegnuu a casa de soldaa, l'ha mai poduu trovà de andà a post, e.... viv bisognava viv....

Sal. E hin propri andaa tutti?

Ter. (*prendendo il libretto della Cassa di Ri-*



*sparmio*) Tutti no, ma quasi (*gli dà il libretto*) Ch'el guarda, gh'è su cent lira anmò.

*Sal. (grattandosi l'orecchio)* E già, vedi....

*Ter.* Come se fa adess a piantà su cà?

*Sal.* Come se fa? Pazienza, el voeur di' che bisognerà spettà ancamò on poo de mès; faroo pussee economia e ghe pensaroo mi a tuttoss. Mi g'hoo minga diritto de lagnamen; quell che l'ha faa per sò fratell, l'ha faa ben a fall; la podeva minga fa divers. Del rest sont content, se ved che la g'ha on coeur d'or!

*Ter.* Oh che bravo giovin che l'è lu!

*Sal.* E lee l'è on angiol! Stemm allegher, el voeur di' che el temp el passa prest.

*Ter. (sospirando)* Eh minga semper, però!

*Sal. (con intenzione)* Per esempi, quand?

*Ter.* A la sira, quand el spetti.

*Sal.* Allora vegnaroo pussee prest, l'è contenta?

*Ter.* Salvator, come ghe vuj ben!

*Sal. (per abbracciarla)* Cara, te see el mè tesor!

## SCENA IX.

Carmelina e detti.

*Carm. (sull'uscio facendo il gesto di spianare un fucile)* Ohe, ohe! Ch'el se faga minga tant attaccaa a la cassa forta, sè de no ghe

foo foeugh addoss. Ma bravo, l'è quella lì la soa prudenza?

*Sal. (stringendo la mano a Teresa)* Che la metta minga giò tanto bordell; s'era adree a saludalla e poeu andava via....

*Carm.* Sì, on salut on poo tropp de confidenza.

*Sal.* Come l'è mai scabrosa! A rivederci stasira, insci sentiroo quaicoss del Carlo (*via*).

## SCENA X.

Carmelina e Teresa.

*Carm. (vedendo Teresa che sarà rimasta mesta)*  
Cosse la g'ha adess? Eccola lì cont tant de muson perchè el sò gimacch l'è andaa via.

*Ter.* Pover giovin, se la savess....

*Carm.* Coss'è succeduu?

*Ter.* G'hoo ditt che la mia dota l'è andada in fumm.

*Carm.* E insci?

*Ter.* L'ha ditt che fa nient e ch'el penserà lu a tutt coss.

*Carm.* Ma se l'hoo semper ditt che l'era on fior d'on fioeu! Quand sarii mari e miee vedarii come sarii content.

*Ter. (sospirando)* Sì, ma adess gh'è temp quasi on ann.



*Carm.* Che bell capital, e mi che m'è toccaa de spettann sès de ann.... Tirava però di sospironi che pareva el mantes de l'orghen de santa Cecilia; eppur hin passaa. Sont stada in attivitaa de servizi, sont stada contenta; e adess godi la mia pension consolandem col me regordi.

*Ter.* Sì, lee la g'ha on bell di'....

*Carm.* Che la g'abbia pazienza che la g'avarà on bell fa! Ma i mè copon che vialter m'avii faa pientà li cont i voster ginginnad.... Voo a feni, perchè bisogna che vaga a scoeudi.

*Ter.* Che la faga pur.

*Carm.* (andando nella camera) Andemm, su allegra!

## SCENA XI.

*Teresa, indi Cav. Onori.*

*Ter.* (tornando al tavolo) Sì, sì, la g'ha propri on bell di' quella bonna donna lì, ma spettà on ann quand se voeur ben.... (guardando il fascicolo sul tavolo di Carlo) El liber del mè Carlo.... Pover el mè fradell, quanti bej sentiment gh'è mai scritt in sti pagin! E di' che quasi mi adess el rimproverava perchè in

causa de vemm consumaa la mia ereditaa, me tocca spettà on ann a spòsà el mè Salvator!

*Ono.* (entrando con un fiore nell'occhiello dell'abito) L'è permess? Che la scusa, bella tòsa, sont tornaa chi perchè me pàr de avè lassaa chi on quaicossa....

*Ter.* (sorpresa si alza e guarda intorno) Forsi i quant o el baston? L'ha voruu incomodass, ghi avaria ben portaa mè frate!l!

*Ono.* (interrompendola) Ma che quant, ma che baston, ma che incomod! (con caricatura) La ved minga che i quant e el baston ghi hoo? In quanto all' incomod hoo faa apposta a tornà mi.

*Ter.* (riservata) In veritaa capissi no....

*Ono.* Sont vegnuu per assicuralla che sò frate!l el sarà tratta polid de mi.

*Ter.* E mi ghe saront riconoscente.

*Ono.* (con vizzo) De vera?

*Ter.* (sempre con gran riserbo) Sì, signor.

*Ono.* (presentandole il mazzolino di fiori) Ghe piàs i fior?

*Ter.* (respingendolo con garbo) Grazie, l'odor el me va alla testa.

SCENA XII.

**Carmelina e detti.**

*Carm. (entrando)* Teresa, hoo veduu de la finestra che ven el tò spòs ( *fingendo di non essersi accorta del Cavaliere*) Oh ch' el scusa, sur Cavalier....

*Ono. (indispettito)* (Ancamò sta veggia!) Se ven el sò spòs, mi la lassi in libertaa.... i informazion che voreva, mi e darà on'altra volta (*si mette il cappello e fa una smorfia a Carmelina*) La saludi!

*Car. (con un sorriso di scherno)* Riverisco tant! (*a Teresa*) In sta volta hoo faa de guardia de finanza: g' hoo faa ciappà el duu de copp a on sfrosadòr!

FINE DELL'ATTO PRIMO.

**ATTO SECONDO**

La scena rappresenta lo Studio in casa del Cav. Onori.

SCENA PRIMA.

**Carlo e Cav. Onori.**

*Ono. (a Carlo che si trova seduto allo scrittoio)*  
Che lavorà el g'ha per i man?

*Car.* On contratt per la vendita de la sostra del sur Rampini, de copia.

*Ono.* Ghe raccomandandi la calligrafia, perchè senza de quella in commercio se fa nient.

*Car.* Me eserciti tutt' i sir dò o tre òr.

*Ono.* Bravo! Quand pocu avaroo regolaa tutt' i mè faccend cont el mè gener e che avaremm fenii de fa l'inventari, el mandaroo a la fabbrica, perchè già vedi che lu fina adess a fa la piazza, l'ha faa domà di fiasch. Diavol, lu l'è tropp timid.... Quand se va a insemi ona robba bisogna minga vegh vergogna; ghe voeur franchèzza; bisogna, come se dis, fa oreggia de mercant, quand anea disen adree

on quaicossa. El ved mi? hoo cominciaa la mia carriera cont el fa la piazza.... L'è da quell punto li che la fortuna la s'è missa in motto per vegnim in contra (*Carlo continua a scrivere*).

## SCENA II.

Roberto e detti, poi Guglielmo.

*Rob. (entrando)* Sur Cavalier, i mè rispetti.

*Ono.* Addio, car el mè Robert, e insci?

*Rob.* Tutt' i commission hin faa. Anca per incoeu podi fermamm chi. El sa, sur Cavalier, che gh'era la richiesta d'ona spedizione per l'America?

*Ono.* Per l'America?

*Rob.* Sì, e la spedizione la faremm lunedì.

*Ono. (a Carlo)* El sent? El mè savon l'è conossuu fina in l'America.

*Car.* Sì, signor.

*Rob. (a Onori)* S'el permett comenci a fa quaicoss (*va a sedere alla scrivania*) Quell paisan el s'è nanca degnaa de saludamm (*alludendo a Carlo*).

*Ono.* El ved, Carlo, quand lu l'andarà a la fabbrica el ciaparà lu la corrispondenza per l'in-

terno, sotta la sorveglianza del mè gener. A proposit, sto mè gener incoeu el s'è nancamò de vedè.... A momenti rivarà mia miee e la tòsa, e lu el sarà minga nanmò chi.

*Gug. (entrando)* Sur padron, è vegnuu denter adess de la porta in carrozza la sura padronna e la padronsina.

*Ono.* L'hoo ditt mi ch'el saria minga staa chi a ricev la spòsa.... Vegni subit in contra (*via con Guglielmo*).

## SCENA III.

Roberto e Carlo, indi Onori, Erminia ed Enrichetta.

*Rob.* Ecco riva anca la spòsa; incoeu consolazion su tutta la linea. Ne sentiremm de bej de quell cretin d'on sur Rampini. Cosse ne dis, èh? Carlo.

*Car.* Che me divertissi mai ai spall de la gent!

*Rob.* (Oh che suss!) Però ghe pàr minga ch'el sur Rampini el g'aveva minga reson de rispondem insci mal jer quand g'hoo daa del ti in sbali?

*Car.* Per mi l'è minga ona robba che me poda interessà.

*Scrittura doppia.*

*Rob.* (Che superbia!) Lu, Carlo, chissà che opinion el se sarà faa de mi per quell'error che hoo faa in quella bolletta de carich l'altre.

*Car.* (freddo) Ah lu le ciama ancamò on error!

*Rob.* (Oh ciappela pur come te voeu che te la faroo mi polid.... anzi, te l'hoo giamò fada!)

*Ono.* (seguito da *Enrichetta* ed *Erminia* in abito da viaggio — *Enrichetta* avrà abbassato il velo) Car i mè donn, el me pâr on secol che ve vedi minga! Cìà, famm on basin, cara la mia *Enrichetta*. E ti, cara la mia metà, cìà, brasciom su.

*Erm.* Come te see ben conservaa!

*Enr.* Te see semper staa ben, ti, papà?

*Ono.* Semper, semper.

*Erm.* Ma gh'è minga chi el sur Steven?

*Ono.* Ma l'è quell che disi anca mi. Incoeu l'ha nancamò de lassass vedè.

*Rob.* (alzandosi) Sura *Erminia*, che la permetta che faga el mè dover. Han faa bon viagg?

*Erm.* El saludi, Robert; sì, minga mal.

*Enr.* (si inchina senza avvedersi di Carlo che si sarà alzato anche lui).

*Ono.* A proposit: ecco che ve presenti el giovin che hoo impiegaa de noeu, come v'hoo scritt.

*Car.* (inchinandosi, mentre *Enrichetta* alza il velo, la riconosce) Oh Dio, lee!

*Enr.* (sorpresa) (El giovin che me vegneva adree!)

*Rob.* (che avrà osservato ciò che agli altri sarà sfuggito) (Se conossen!)

*Erm.* Hoo piasè de vedell.

SCENA IV.

Steven e detti.

*Ste.* (entrando abbigliato con un po' di caricatura) Perdon, perdon se me sont, insci per di', piantaa in d'on alter sit.... Han faa bon viagg? E.... (ad *Enrichetta*) la mia dolce futura l'è minga negada ai bagn de mar.... cioè annoiada, che bestia! voreva di'.

*Enr.* (con distrazione) In sto moment savaria nanca cosse rispond.... g' hoo tant bisogn de respirà on poo....

*Ste.* Sì, sì, che la respira pur; mi invece no foo che sospira.

*Erm.* (ad *Onori* dandogli uno scontrino) Toeu, Gioachim, manda a la stazion a ritirà i bagali.

*Ono.* (dando lo scontrino a Carlo) Carlo, ch'el vaga a la stazion a ritirà sti bagali.

*Car.* Subit!

*Ono.* Ch'el faga prest.

*Car.* Sì, signor (via guardando di furtivo *Enrichetta*).

*Erm.* Basta, adess andemm de là a mettes on poo in libertaa.

*Enr.* (Che combinazion!.... Come el fa a vess chi?....)

*Ste.* (ad *Enrichetta*) La permett che ghe daga el brasc?

*Enr.* Grazie, fa minga de bisogn (*esce per la prima a sinistra*).

*Ste.* Va ben, gh'è minga mal! (*dando il braccio ad Erminia*) Allora che la se tacca lee.

*Ono.* L'è on poo stracca del viagg....

*Erm.* Ma sigura!

*Ste.* Ch'el senta, Robert: quand ven indree quell'alter giovin, ch'el ghe disa che g'hoo de bisogn la copia de quell contratt.

*Rob.* Sì, signor! (*via tutti*).

## SCENA V.

**Robert, indi Steven.**

*Rob.* (*sedendo al tavolo*) Me pâr de vessem minga sbagliaa, hoo vist on certo sguardo d'intelligenza.... Che ghe sia de mezz on quai romanzett? All'erta, che a sto mond chi non risica, non rosica. Chissà se quell cretin d'on sur Steven l'ha ricevuu la mia lettera.... Se

el Cavalier l'ha ricevuu el giornal *La Vespa*.... Oh l'ha de vess bella, me vuj diverti!

*Ste.* (*entrando*) Se la spòsa la g'ha la luna, che se le tegna; la ghe passerà con comod. L'è mej che vaga a feni i trattativ per vend la mia sciostra (*a Robert*) Com'è, l'ha nancamò de vegnì indree el sò compagn?

*Rob.* Come el ved.... no.

*Ste.* Ma mi g'hoo bisogn el mè contratt per la vendita de la mia sciostra; a st' ora chi el doveva vess copiaa e stracopiaa! Ch'el guarda on poo se le troeuva.

*Rob.* Subit (*si alza e va a cercarlo*).

*Ste.* El gh'è?

*Rob.* Ma, gh'è chi tanti cart, ma el contratt el vedi minga.

*Ste.* (*impazientandosi*) Che asen, el doveva consegnaghel a lu prima de andà via!

*Rob.* Ben, ch'el g'abbia on poo de calma ch'el trovaremm.

*Ste.* (*c. s.*) Calma, calma, avaria faa di lej affari mi cont la calma.... A trent'ann g'avaria minga dusent mila lira al sò! Ma quell'asen de quell Carlo, se el voreva andà via, el doveva prima feni de copià la scrittura!

*Rob.* Sigura, el g'ha ben reson!

*Ste.* Ch'el me lassa on poo vedè a mi (*cerca fra le carte e trova un fascicolo*) Chi gh'è

on fascicolett... (*legge*) « I prediletti della fortuna, racconto di... » tre stellet.

*Rob. (ride)* Ah! ah!

*Ste. (legge ancora)* « L'intelligenza di fronte al ricco incenso, considerazioni di... » tre stellet...

*Rob. (ride ancora).*

*Ste.* Ma cosse l'è sta robba chi?

*Rob.* Ahn hin di scarabocc li del Carlo; el pretend de vess on autor.

*Ste.* Autor l'è quell che scriv, eh?

*Rob.* Sigura.

*Ste.* L'intelligenza di fronte al ricco incenso... considerazioni di... tre stellet.

*Rob.* El sarà scritt censo, e minga incenso.

*Ste.* Ah! E invece de lavorà, eh?...

*Rob.* Sigura, el se dà d'intend de vess on filosofo!

*Ste.* E sti tre stellet chi cosse voeuren di'?

*Rob.* Hin asterischi; l'è ona specie de firma che metten quij che scriv per conservà l'anonym.

*Ste.* El fa el scrittor anonym? Speccia on poo... (*tira fuori una lettera*) Allora l'è lu che ha scritt sta lettera chi che me dà del carretin. Ch'el se figura, on carretin a mi, senza merito e pieno di denaro (*leggendo*) Pien de danee pazienza, ma senza merit, poeu.... Che bestia!

*Rob. (ridendo)* Un carretin?

*Ste. (dandogli la lettera)* Ch'el guarda se l'è minga vera.

*Rob. (leggendo)* Chi el dis cretino, e minga carretino.

*Ste. (riprende la lettera e legge)* Già, già, cretino; e coss'el voeur di'?

*Rob.* Me ricordi pù polid; ch'el spetta, ch'el guarda el dizionari, chi a la lettera *ce, cr...* (*gli dà un dizionario*) (S'el savess che l'hoo scritta mi!)

*Ste. (prende il dizionario e cerca la parola)* Cretino!.. Brutto asen d'on spientaa!

*Rob. (ridendo sotto i baffi)* E insci, cosse el voeur di'?

*Ste. (mettendo nella tasca di dietro dell'abito il dizionario)* El voeur di' on carrett de dò roeud.

SCENA VI.

*Cav. Onori e detti.*

*Ono. (entrando)* Cosse l'è ch'el g'ha, se pò savell?

*Ste.* Coss' hoo de vegh.... G' hoo ch'el sò scaraboccin, quell sò sur Carlo, l'è on insolent de prima forza, on scrittor de letter anonym, el

capiss? Vun che quand el scriv, per no fass conoss, el se firma cont tre.... ast.... astr.... cont tre stellett.

Ono. Ch'el disa, el parla arabo?

Ste. Parli come se dev, quand gh'è de la gent che se toeu certi libertaa....

Ono. Mi ghe torni a di' che capissi nient.

Ste. El capiss nient? *(sedendo sopra una sedia non si accorge di avere il dizionario in tasca)* El capirà col temp.... Ahi! *(si alza con uno sbalzo e tira fuori il dizionario di tasca)* Quell bellee, torni a di', d'on sur Carlo el scriv di letter anonim, e senza nanca i tre stellett per firma; e poeu el se permett de damm de sti titol *(gli mostra la parola cretino sul dizionario)*.

Ono. Cretino?

Ste. *(tirando fuori ancora la lettera di tasca)* Sigura, ch'el guarda, l'è propri scritt insci; credeva minga nanca mi, ma l'è staa lu *(accenna a Roberto)* che m'ha daa i dilucidazion....

Ono. Brutt insolent! Ma e lu, Robert, el g'ha di proeuv ch'el Carlo el scriva de sti imper-  
tinenz?

Rob. Mi no, ma soo ch'el scriv anca in di giornai....

Ono. In di giornai? Ma allora l'è staa lu che

m'ha miss in ridicol su la *Vespa*.... l'è staa lu che l'ha scritt che mi la cròs de cavalier, che g'hoo avuu de motto proprio del re, me l'han dada perchè g'hoo daa l'insavonada anca ai biroeu de cort.

Ste. Quell l'è ona bestia! E pensalla ch'el g'ha nanca trenta sold al sò....

Ono. Ma adess a nun, càr el mè scior....

Ste. *(prendendo il fascicolo di Carlo)* E poeu, ch'el guarda coss'el fa in di òr de studi, in di òr che l'è pagaa per lavorà: di scrittur anonim.

Ono. Ben, el vedarà cosse faroo mi! *(Se no el fuss per soa sorella....)*

Ste. Ma, e el mè contratt che g'aveva daa de coplà? De chi a mezz'ora devi trovamm cont el comprator....

Rob. El ved, se me l'avess daa a mi....

Ste. *(impaziente)* Grazie! — Dal sèno di dopo son pieni i canali, — come diseva quell tal.

SCENA VII.

Carlo e detti.

Ste. *(a Carlo che entra)* Ah l'è chi finalment!

Car. Sì, signor *(va al tavolo per lavorare)*.

Ono. L'ha fenii o no de coplà sto contratt chi del sur Steven?



*Ste.* Hin tre òr che sont adree a cercall!

*Car.* Ma l'è appena ona mezz'ora che sont via per andà a la stazion....

*Ste.* Mezz'ora, on'ora, dò, tre! El doveva, prima de andà via, consegnaghel chi al sur Robert, che a st'ora el saria fenii.

*Car.* Ma hoo dovuu andà via chi per el sur Cavalier.... Mi credeva de rivà a temp.

*Ono.* (Come el marca quell Cavalier! Oh l'è lu senz'alter che m'ha miss in ridicol su la *Vespa*.... Oh se ghe fuss minga de mezz quell bell mofin de soa sorella!)

*Ste.* Torni a di' ch'el doveva consegnaghel chi a lu, perchè anca a mi mè se dev minga mancà de rispett.... perchè diman o dopo mi saront el sò principal.

*Car.* L'è perchè chi gh'è di paroll che hoo minga poduu decifrà.

*Ste.* Decifrà? Coss'el voeur di'?

*Car.* Paroll che capissi no.

*Ste.* Andemm mal s'el capiss minga la mia scrittura insci ciara e commercial!

*Car.* (va a prendere il contratto e la copia) Ch'el scusa, la soa scrittura la conossi benissimo, ma gh'è chi di fràs che me pâr che vagen minga.

*Ste.* (prendendo il contratto) Ch'el me lassa on-poo vedè.... I mè fràs hin semper andaa e andarann semper!

*Car.* (mostrandogli un punto del manoscritto)

Ch'el guarda chi, per esempi: « Il proprietario « che rileva ovvero sia che compera la so- « stra da me, sopra e sotto scritto.... » Ecco, a mi me pâr che quell *sopra* el sia superfluo.

*Ste.* (sollevando il capo) E a mi invece me pâr ch'el sia superfluo nient affatt! Quand se g'ha duserent mila lir al sò, se g'ha minga de bisogn che di strapellaa vegnen a fa la metta. Se in principi del contratt gh'è el mè nom, se pò benissimo scriv sopra e sotto scritto! (dando a Roberto il manoscritto) Ch'el toeuja, Robert, che me ne faga lu ona copia de bell noeuv. Già, l'è istess, el firmaroo diman....

L'era mej che ghe l'avess daa a lu adrittura!

*Ono.* Ch'el vaga innanz a famm qui cunt che g'hoo daa jer.

*Car.* (sospirando va al tavolo a prenderli) Ecco, hin fenii.

*Ono.* (prendendoli) Ch'el lassa on poo vedè.... Ahi, ahi! ma gh'è sbagliaa l'intestazion! E poeu, te chi, te chi! El m'aveva promiss de fa di esercizi per migliorà la calligrafia, e invece me pâr ch'el pensa a tutt'alter.

*Ste.* E che alter!

*Ono.* (osservando sempre il conto) Sti numer chi paren qui numer del lott che se fa cont i ragn mojaa in l'incoster.



*Ste.* Alter che fagh la critica a chi pò mandall giò in d'on boccon! E poeu se pretend de scriv di storiell cont quella calligrafia.... Adess se capiss perchè el ghe mett minga la firma ai sò scarabocc.... l'è per no fass dà de l'asen!

*Car.* Ma, el preghi: ch'el guarda che mi a lu g'hoo mai mancaa de rispet.

*Ste.* Al sò no, ma a ciàr de luna sì.

*Ono.* (dando i conti a Robert) Ch'el toeuja, Robert, ch'el rifaga anca sti cunt.

*Car.* Se mi hoo mancaa in quaicoss l'hoo faa senza intenzion, e me dà minga tanto gust a sentimm a rimproverà in sta manera. Lu, sur Cavalier, el m'aveva promiss de compatimm per el prim mès; del rest, poeu, in dove hin sti demerit?

*Ste.* Sfacciaa!

*Car.* Ma, cara lu, el preghi de sta in di termin! Se podaria savè la causa de tutto sto livôr?

*Ste.* Ch'el parla minga difficil.... Ch'el sappia, sur anonim tre.... tre ast... astr.... insomma tre stellet, che la soa lettera la m'ha nanca toccaa la scima di papozz!

*Ono.* E che la cròs de cavalier ghe l'hoo avuda minga per avè insavonaa tutt' i biroeu de la cort, ma de moto natural del sovrano!

*Ste.* Per avè daa di potenti button all'industria del savon.

*Ono.* Perchè el dev savè ch'el mè savon, al di d'incoeu, el lava quasi tutta l'Europa.

*Ste.* E altri siti ancora.... el lava.

*Car.* Ma mi ghe giuri che capissi propri nient.

*Ste.* (mostrandogli la lettera) Carretin, cioè, cretin, pien de danee e senza merit!

*Ono.* (mostrandogli un giornale) La *Vespa*, giornale cont caricatur!

*Rob.* (Oh che teater, come me la godi!)

*Car.* Ma ghe torni a di' che mi capissi nient; che faghen piase a spiegass.

*Ste.* Se spiegaremm, se spiegaremm! Quand s'è impiegaa sotta a della gent che g'han ona posizion pussee alta d'on quint pian....

*Ono.* Quand s'è nanca bon de fa ona somma....

*Ste.* Se scriv minga di spiritositaa anonim, o pezza d'asen!

*Car.* Oeuh!

*Ono.* E se mett minga in ridicol i sò benefattor su per i giornai.

*Car.* (scorgendo Roberto che ride) Adess hoo capii.... Gh'è staa quachedun che m'ha calunniaa a tort! Mi scriv di letter anonim.... mett in ridicol sui giornai i mè benefattor!

*Ste.* L'è forse minga vera ch'el scriv senza la firma?

Ono. L'è fals ch'el stampa di sproposit sui giornai?

## SCENA VIII.

*Erminia, Enrichetta e detti entrano e si fermano ad udire.*

Car. Sì, l'è vera, hoo stampaa ona quai novelletta, ma hoo mai scritt in maniera che pòdess offend chi se sia.

Ono. Ch'el me daga on poo i proeuv che l'abbia minga scritt lu sta lettera e ch'el sia minga staa lu a stampà qui insolenz.

Ono. Già, che le proeuva!

Car. Ma come hoo de fa a provall? (*vedendo Roberto che ride ancora*) Ben, sì, per diman ghe daroo i proeuv! (*va al tavolo a lavorare*).

Erm. (*avanzandosi*) Finalment hin fenii sti guaj? A mi me pâr però che quand on impiegaa el se permett de fa di robb compagn, el se mett a la porta e l'è bell' e fenida.

Ste. Brava la mia suocera, l'ha propri miraa in del segn.

Ono. Oh s'el me porterà minga i giustificazion disturbet minga che savaremm cossa emm de fa!

Enr. (Pover giovin, ma perchè el mortifichen in quella manera?!)

Erm. Disi, de là gh'è el giovin del Marlian in galleria, per la scelta di vestii de la spòsa.

Ono. Vegnem (*tira fuori di tasca due cambiali*) De già che hin scritt de soa man, ch'el scriva la data su sti dò cambiai (*le consegna a Carlo*) Andemm, donca, Steven.

Ste. Andemm pur (*ad Enrichetta*) Cìà, che la me daga el brasc.

Enr. (*guardando Carlo*) No, no, sent minga stracca!

Ste. (Ancamò?!). Che la permetta almen che ghe basa la man (*prende la mano di Enrichetta*).

Car. Ohimè!

Ono. (*avvicinandosi a Carlo*) Ma, cosse l'è che l'ha faa? Oh per Dio! El g'ha traa su l'incoster su i cambiai invece de la sabbia!

Erm. Car Signor, che tappa!

Ste. Ma l'è propri bon de mett in d'on sit che passa nissun!

Ono. Dò cambiai per cinqu cent lira, giamò accettaa, e d'on debitòr che gh'è voruu quatter mès per fagh riconosc el sò debit! (*gliela strappa di mano*) Ch'el vaga a disnà che el sarà mej!

Enr. (Pover giovin, come l'è umiliaa!)

Ono. (S'el fuss minga per soa sorella, chissà a

st'ora in dove l'avaria giamò mandaa!) (*tutti si ritirano, meno Carlo e Roberto. Steven resta ultimo e si avvicina alla scrivania dove si trova Carlo*).

Ste. Pezza d'asen!

Car. (*fa un gesto di minaccia*).

FINE DELL'ATTO SECONDO.

## ATTO TERZO

Scena come nell'atto secondo.

### SCENA PRIMA.

**Carmelina e Guglielmo.**

*Carm. (entra e siede su una poltrona)* Ch'el faga piase a digh al sò padron che sont stuf fa anticamera; e che adess me setti chi; l'ha capii?

*Gug.* Ma, cara lee, mi vuj minga ciappà ona lavada de coo in grazia soa.

*Carm. (gridando)* Ma l'è questa l'educazion che gh'è in sta cà?

*Gug.* Che la vòsa minga!

*Carm.* Già, ch'el scusa, l'è el mè caratter.... Ma come l'è ch'el m'ha annunciaa?

*Gug.* Oh bella, g'hoo ditt che gh'era chi ona sciora veggia....

*Carm.* L'ha faa mal! El doveva digh che gh'era

*Scrittura doppia.*

chi ona sciora giovina, ch'el m'avaria ricevuu subit.

Gug. (guardando a destra) Eccol chi el padron (via).

SCENA II.

Onori e Carmelina.

Ono. (entrando non avvedendosi subito di Carmelina) Che la scusa se l'hoo fada spettà....

Carm. Ch'el se figura! Stava benissim chi set-tada giò.

Ono. (sorpreso) La vesina del Carlo?

Carm. Propri, la guardia d'onor de quella povera famiglioela.

Ono. E cosse la voeur de mi?

Carm. Adess, cont on poo de pazienza, le savarà. (sempre seduta, tira fuori da una borsa un astuccio e gli occhiali che si pone colla maggior calma, e quindi una lettera che si mette a leggere alzando la voce gradamente) « Sapendo che siete promessa sposa, credo che un bel pajo di orecchini orneranno bene il vostro grazioso visino.... »

Ono. (con impazienza) La preghi, che la vòsa no.

Carm. Ch'el scusa, vedel, l'è el mè caratter.... (tornando a leggere alzando di più la voce)

« Vostro fratello non è all'altezza dei bisogni del mio studio, ma mi ricordo sempre di voi.... (Onori continua a far segni d'impazienza) » e delle vostre raccomandazioni, quindi « chiudo un occhio.... »

Ono. Hoo ditt de vòsa no!

Carm. (prosegue non badandogli) « Se mi permettete, mi recherò da voi per dirvi i difetti di vostro fratello e per essere beato di un vostro sorrisetto (marcando, con voce alta) » Date di lungo a quella vecchia so-spettosa vostra vicina, che la sostituirò io nel proteggermi.... »

Ono. Ma ghe torni a di' de parlà on poo pussee adasi!

Carm. « Nessuna risposta a questo mio biglietto, vorrà dire che non sdegnate che vi venga a trovare. » (alzandosi) La risposta invece ghe la porti mi! (dandogli l'astuccio degli orecchini) Quisti chi hin i pendent; che si e tegna che sarann bon de regalagh a ona quai.... sì, no soo se me spieghi; che sta volta la veggia sospettosa la g'ha la soddisfazione de nettagh la bocca (gli pulisce la bocca col fazzoletto).

Ono. (respingendola) Che la staga indree, che se la me manca de rispettà la foo mett a la porta di mè servitor.

*Carm. (siede alzando la voce)* Ma andemm, che le faga pur; ch'el ciama magari anca la soa miee!

*Ono. (concitato)* Ma l'ha capii de vòsa no!

*Carm. Ah sì, ch'el scusa, vedel, l'è el mè caratter.... (gridando ancora)* Sì, disi, e ch'el ciama magari anca la soa pòpola, che ghe cuntaroo su i bej scappad de Trovator cont i scanse ch'el se ingegna de fa lu.

*Ono. Ma l'ha capii de tasè? (Veggia stria!)*

*Carm. (alzandosi)* Ma là, ch'el scusa, l'è el mè caratter.... Ch'el senta, per sta volta el lassi in libertaa e che se ne parla pù de sto bell fiasch; ma a on patto però: e l'è che lu el toeuva minga a persepità quell mè pover Carlinasc tanto bon, perchè el dev savè che el Carlo el sa nient.

*Ono. Ah donca el Carlo el sa nient? Ben, allora semm intès e che se ne parla pù.*

*Carm. Va ben. G'hoo l'onor de riverill! (si inchina)*

*Ono. Ma che la me daga la mia lettera.*

*Carm. Câr el mè câr sur Cavalier, ma lu el me cred ben ona gingiovaria.... Le sa?... el mè nono ch'è staa in Russia, el diseva semper che bisogna mai sbassà i arma fina ch'el nemis el se troeuva a la frontiera. Donca, sur Cavalier, mi el riverissi (si inchina) Serva.... Già, ch'el scusa, l'è el mè caratter! (via).*

*Ono. Brutta veggia impertinenta.... Quanto mai me sont compromess! Adess, acqua in bocca.... podi pù digh nient nanca a quell' asen che m'ha faa mett in ridicol sui giornai! E soa sorella? Brutta smorfietta, fava propri bisogn de digh tuttccoss a quella veggia stria... Sì, adess l'hoo fada bella! L'è mej che vaga a dagh ordin a la portinara che se la ven on'altra volta che le lassa minga passà (via).*

## SCENA III.

*Enrichetta, indi Erminia.*

*Enr. (entrando)* El papà el va via, el pâr de cattiv umor.... Allora l'era minga quest el moment bon de podè parlagh.... Cara la mia mamma, se te ghe fusset al mond ancamò te permettariet minga che la toa Enrichetta la fuss obligada a spòsà on omm che ghe piàs minga, on omm antipatigh come el sur Steven.... Che combinazion però de trovà chi impiegaa del papà quell giovin che me vegneva adree a la festa quand andavem a spass in su i bastion.... Ma come l'avarà faa? Ch'el sia staa per vess a press a mi? El dev vess per quell, se de no el se lassaria minga stra-

pazzà insci, senza di' nient.... Strapazzaa in quella maniera propri de quell che pretend de spòsam.... Pover giovin, quanta pazienza! Ma, e s'el fuss minga per podè vedemm che el se lassa maltrattà in quella maniera? (*mesta*). Oh Dio!

*Erm. (entrando)* Ma, Enrichetta, perchè dopo che semm rivaa te scappet semper lontan de mi?

*Enr.* Mi? Hoo ditt che l'è on poo de di che me senti minga ben....

*Erm.* Sì, g'hoo tutta la bonna volontaa de credet, se de no soo minga cosse dovaria pensà per la maniera che te trattet el tò spòs (*si siede*).

*Enr.* El mè spòs? L'è minga nancamò.

*Erm.* El sarà incoeu, però.

*Enr.* E se mi me sentiss minga forta assee de fa sto sacrifici?

*Erm. (balzando in piedi)* Sacrifici?! Ma se l'hoo semper ditt mi che a leg certi liber te avariet fenii a scaldass la testa!

*Enr.* No, no, me sont minga scaldada la testa; adess l'è el mè coeur che ragiona e che se ribella. S'era vegnuda chi propri per parlà cont el papà, e digh ciàr e nett de obbligamm minga a fa on pass insci doloros, che per mi la saria ona vera disgrazia.

*Erm.* Ma se ne pò senti de pesg? Ona disgrazia! Sò pader el g'ha tropp bon sens per dagh atrà ai sò ridicolaggin. Che la pensa che de sto matrimoni se ne parla che l'è pussee d'on ann.

*Enr.* Per quell me ne importa nient. L'è minga ona reson che perchè se sia parlaa d'on matrimonio, se sia propri obbligaa a ligass cont on omm antipatigh.

*Erm.* E se spetta propri adess a di' ch'el sur Steven l'è antipatigh? Dopo tanti mès de avè acconsentii a sto matrimoni!

*Enr.* Hoo mai ditt nient sperand che succedess on quaicoss che le trass a mont.

*Erm.* Basta, gh'è chi sò pader; el ghe penserà lu a desgarbiagh la testa.

*Enr. (risoluta)* Mi invece speri ch'el me darà atrà. Ma ghe parlaroo però quand el sarà de per lu (*si ritira risolutamente*) Oh se ghe fuss ancamò la mia povera mamma!

## SCENA IV.

*Erminia, indi Onori.*

*Erm.* Insolentella! Chi pò capì capissa cosse gh'è in quell coo.... Chi sa perchè sto cambiament.... E a di' che l'è domà de quand semm tornaa de campagna!

*Ono. (entrando)* Oh te see chi, cara la mia Erminia? T'ee forse sentii a vòsa chi insci, èh?

*Erm.* No, perchè s'era in del mè gabinett.

*Ono. (Meno male).*

*Erm. (sedendo)* Câr el mè Gioachim, g'hoo ona roba de diitt e importantissima.

*Ono. (sedendo)* Importantissima? Te me fee vegni su la pell de capon! (Che la savess on quai-coss de quell che hoo faa?)

*Erm.* T'ee minga vist in l'Enrichetta on certo cambiament....

*Ono.* Ah! Sì, me pâr.... (Respiri, la sa nient!)

*Erm.* Insomma, per tajà curt, la s'è missa in testa de vorè sposà pu el sur Steven.

*Ono. (alzandosi)* Ma te diset de bon?

*Erm.* Alter che de bon, magari el fuss minga vera! Sto matrimoni, che mi el ritegni ona fortuna, lee l'ha dis che l'è ona disgrazia.

*Ono.* Ona disgrazia? (Povera mi, quell mancaria! El Steven ch'el m'ha imprestaa cinquanta mila lir a condizion che mi ghe dass la tòsa!) Mi credi però che la vorarà minga obligamm a fa pesà tutta la mia autoritaa.

*Erm.* L'è appunto quell che voraria vedè. A bon cunt però el saria mej fa prest a firmà el contratt.

*Ono.* Ma già, se de no me trovaria in d'on bell imbroj. El contratt el se firmarà subit incoeu. Me intendaroo mi cont el Steven.

*Erm.* Bravo, a fa insci se capiss che te agisset de omm. Ven, andemm a cercalla.

*Ono.* Ah sì, l'è necessari!

SCENA V.

Roberto e detti.

*Rob. (entrando)* Sur Cavalier, el cap fabbrica....

*Ono.* Sì, me le dirà on'altra volta. Andemm, andemm, Erminia.

*Erm. (via dietro ad Onori)* Ah se la fuss mia tòsa!

SCENA VI.

Roberto, indi Steven.

*Rob.* Chissà cosse è succeduu de vess insci agitataa.... Saria curios de savell (*va a guardare verso la porta per la quale sono usciti Onori ed Erminia*) Se sent nient (*va per sedere al tavolo*) G'hoo semper in ment quell segn de sorpresa faa de la sura Enrichetta e chi del Carlo... (*con caricatura*) L'è mej che mi staga attent; g'hoo ona certa idea.... Quell superbiatt bisogna che cerca de fagh fa spazzetta, se de



no on quai di me le fa fa a mi (*accende uno zigarò*).

*Ste. (entrando)* Comè, comè, el fuma invece de lavorà?

*Rob.* Ch'el scusa, ma mi nelle grandi occasioni fumi.

*Ste.* Nelle grandi occasioni?

*Rob.* Propri nelle grandi occasioni (*alzandosi*) (E st'occasion me la lassi minga scappà).

*Ste.* Grand o piccol, va ben; ma ch'el me disa se gh'è el sur Cavalier, perchè ghe ne vuj di' quatter per la maniera che la me tratta la mia spòsina; vuj savenn el motiv.

*Rob. (con intenzione)* El motiv el soo mi....

*Ste.* Comè, lu?

*Rob.* Almen, credi de savell.

*Ste. (prendendolo per un braccio)* El cred de savell? Andemm, foeura, prest, ch'el disa cosse l'è?

*Rob.* Ecco: jer, quand è rivaa la sura Enrichetta, hoo veduu on certo motto tra lee e chi el noster caro Carlo come de riconosciment.... ona certa sorpresa....

*Ste.* On motto de riconosciment? Hin de là?

*Rob.* Sì.

*Ste.* Voo a famm dà cunt de quell motto! (*via*).

## SCENA VII.

*Roberto, indi Carlo.*

*Rob. (andando a sedere)* El sass l'è traa.... Càr el mè sur Carlo, l'aria de sta casa l'è bonna più per i sò polmon.

*Car. (entra e va ad appoggiarsi coi gomiti sullo scrittoio di Roberto)* Donca, adess el penserà a dà i proeuv che mi no sont nè l'autor de quell ch'è staa stampaa sui giornai, nè della lettera anonima mandada al sur Rampini.

*Rob.* Mi?

*Car.* Sì, lu!

*Rob.* Ma, disì, a lu ghe gira i mezzanitt?

*Car.* Ma, dimm on poo, te podevet minga cercà on alter mezzo per vendicass?

*Rob.* Mi?

*Car.* Ti! (*alzandosi con dignità*) Brutt vile! che te gh'ee avuu el coeur de fà di insinua-zion, coll'intenzion de famm del mal! Sì, hoo capii de la maniera che te ridevet quand sta mattina m'hann mortificaa in quell modo. Ma, dimm on poo se mi hoo faa la spia, se mi g'hoo cuntaa al principal che l'alter di t'ee falsificaa quella bolletta de carich de la sta-



zion e che t'ee miss in saccoccia cinquantatrè lir.... Me sont limitaa a ditt de fall pù on'altra volta. E ti te se vendichet insci del ben che t'hoo dimostrarà?

*Rob.* Mi disi che lu l'è matt, e che mi hoo faa nient de tutt quell ch'el dis lu.

*Car.* Oh?!

SCENA VIII.

Guglielmo e detti.

*Gug. (entrando)* Sur Robert, le ciama el padron.

*Rob. (si alza in fretta)* Vegni subit! *(si avvia).*

*Car. (a Roberto)* Parla remm poeu dopo de quell'affari.

*Rob.* Sì, sì, quand el voeur; adess bisogna che staga ai mè dover *(via).*

SCENA IX.

Detti, indi Steven.

*Car.* Eren minga assee tutt' i umiliazion che m'è toccaa soffri, g'hoo anca on nemis ai cal-cagn che me mina.

*Gug. (piano a Carlo)* Ch'el se fida minga, vedel, de quell gesuita ch'è andaa foeura adess. L'è la spia de cà; el g'ha semper faa ona guerra a mort, a la sordina, a tutti quij ch'è staa chi.

*Car.* Oh ch'el lassa fa che l'hoo giamò conossuu! Ma quanti robb me tocca sopportà per cent lira al mès!

*Gug.* Ch'el disa nient, però, se de no el me compromett.

*Car.* No, no, ch'el g'abbia minga paura!

*Gug.* El dirà propri nient?

*Car.* Ma no!

*Gug.* Ben, allora ghe disi ona robba: el dev savè....

*Ste. (entrando con un plicco in mano)* Ecco, via la gatta balla i ratt. Nun ghe paghem el sò bravo mès, e l'òr tran via el temp parland a pòs i spall di sò padron.

*Car. (andando a sedere al suo tavolo)* Siccome che de tutt quell ch'el dis lu, gh'è nient de vera, g'hoo minga bisogn de fa di scus.

*Ste.* Che superbia! *(a Guglielmo)* In dove l'è el sur Robert?

*Gug.* L'ha domandaa el sur padron.

*Ste. (a Guglielmo)* Andee pur *(Guglielmo via)*

Eccol li! *(accennando Carlo)* In quanto al motto che m'ha parlaa Robert, el me pâr on

sogn bell e bon.... Dopo tutt, pussee tard se firmarà el contratt, e quand la sura Enrichetta la sarà mia miee quell scior lì el farà piase a ciappà el duu de copp. Però vuj fagh cieca, vuj divertimm on poo. Lu el s'è divertii de mi, donca.... Adess t'el daroo mi el carretin... o el cretin! (a Carlo) Ch'el disa, èj, Carlo....

Car. (alzando la testa) El m'ha ciamaa?

Ste. Me pâr. L'avarà sentii anca che ciamava el sur Robert.

Car. Diffatti....

Ste. E se el sur Robert el gh'è minga, a mi me pâr....

Car. (alzandosi) El g'ha forse de bisogn on quaicoss?

Ste. Ecco, per fagh vedè che me regordi pù di insolenz ch'el m'ha ditt adree, ghe doo de rivedè la brutta copia del mè contratt de matrimoni cont la sura Enrichetta che emm de firmà incoeu; ch'el guarda se gh'è denter on quai sproposit, che gh'el faremm vedè al nodar quand el vegnarà (gli dà il fascicolo) Ch'el toeuja, ma ch'el ghe guarda polid, nèh! (con ironia).

Car. (colpito) El sò contratt de matrimoni?

Ste. Già, el mè contratt de matrimoni cont la sura Enrichetta; cosse gh'è de fassen maraviglia? (Ch'el motto che l'ha ditt Robert el

fuss propri on motto?) El ved, dent in quell contratt gh'è tutta la mia felicitaa.... E si! se g'ha minga di mila lir al sò per nient.

Car. Mej per lu se l'è insci fortunaa!

Ste. Ma già, quand s'è bon de fa on quaicoss....

Basta, mi adess voo giust in del nodar; ch'el corregia polito, nèh! che ghe tornaroo a dà la mia protezion (per andar via) (Creppa de rabbia, e de chi prest te ciapparee el luster!) (tornando indietro) Ma me raccomandandi i proeuv che l'è minga staa lu a scrivom quella lettera (via).

SCENA X.

Carlo, indi Enrichetta.

Car. (con in mano il contratto) El contratt de matrimoni de quella che ghe vuj ben.... Chi l'avaria mai ditt che quella tōsa, che l'era tutt i mè penser, che g'hoo tenduu adree insci tant, che m'è vegnuu in sogn tanti volt a consolamm, avess de trovalla chi in sta casa... Pover Carlo, on'altra disgrazia.... Ecco cosse el voeur di' a vegh minga ona posizion a sto mond! Perchè sont staa insci trascuraa quand podeva studià sul seri e minga tra via el temp cont di illusion... (andando al tavolo)

Basta, per mi gh'è pù nient al mond!.... Ma dovè leg el contratt de matrimoni de quella donna che m'ha faa batt el coeur per la prima volta, l'è on martiri che podi minga sopportà! (*si nasconde il viso fra le mani*).

*Enr. (entrando e vedendo Carlo in quella posizione)* El se sent mal, Carlo.... sur Carlo?

*Car. (alzandosi con sorpresa e commosso)* Lee chi?

*Enr. (imbarazzata)* Cercava el Guglielmo... L'è minga chi el Guglielmo?

*Car.* No, la ved ben ch'el gh'è minga.

*Enr. (titubante)* L'è che.... cioè, me pariva che lu el se sentiss mal.

*Car. (con timidezza)* Mi no, ma la ringrazi de tanta premura.

*Enr.* Coss'el voeur, mi soffri a.... vedè a soffri i.... alter.... e patissi immensament quand senti a strapazzà on quaichedun.

*Car.* Quand la sent a strapazzà?

*Enr.* Per esempi jer, quand el mè papà el ghe vòsava adree, me sont inquietada al punto de famm fa di osservazion de mia mader.

*Car.* Ma che la creda però che sò papà el me strapazzava senza reson; la ghe voeur però tutta a credem capace de scriv di letter anonim, e sostegni che mi hoo scritt sui giornai di offès!

*Enr.* Ma l'è minga vera, forse, che lu el scri sui giornai?

*Car.* Sì, l'è vera, ma hoo mai scritt di robb de avegh vergogna a dichiaramm autor. Hoo scritt di novellett, di racconti che hin staa stampaa in vari giornai e in liber separaa.

*Enr.* Ma mi leggi molto l'appendice di giornai e quasi tutti i liber noeu che se pubblica, ma me pà de avè mai trovaa tra el nom di autor el sò: Carlo Gualdi.

*Car.* L'avarà trovaa però: Rinaldo Fiori.

*Enr. (con interesse)* Rinaldo Fiori? Ma sì, ne hoo leggiuu vari di sò lavori, pien de coeur e de sentiment onest.... No, no, sur Carlo, lu el pò minga vess capace de scriv di letter anonim o di alter bassezz come voeuren incolpall.

*Car. (con trasporto)* Oh grazie, sura Enrichetta, questa l'è la prima e vera consolazion che m'hann procuraa i mè pover lavori! Oh se podess vegh semper on confort compagn, senti che feniria a famm on nom.

*Enr.* Sur Carlo, ma lu donca l'è molto infelice s'el se esalta così per poch!

*Car.* Che la me perdona, sura Enrichetta, se me sont lassaa trasportà, ma per quell pover diavol ch'è minga suefaa a sentiss a lodà, ona parola gentile d'ona pòpola come lee l'è

*Scrittura doppia.*

on ver balsim! (*come riavendosi*) Ma povera mi, adess perdi temp e el sur Steven el tornarà indree e el me vòsarà sicur se hoo minga fenii de rivedè el sò contratt de matrimoni.

*Enr. (con dolore)* El mè contratt de matrimoni?

*Car.* Propri, quell che ha de fa la soa felicitaa (*tornando al tavolo*).

*Enr. (sospirando)* La mia felicitaa....

*Car.* E perchè no? El sur Steven l'è on bell scior, e....

*Enr.* Oh cattiv!

*Car. (alzandosi tra commosso e confuso)* Cattiv?

## SCENA XI.

**Erminia e detti.**

*Erm. (a Enrichetta)* Cosse l'è sta novitaa? Te credeva in la toa stanza.

*Car. (torna a sedere confuso).*

*Enr. (confusa)* Sont vegnuda chi a cercà el Guglielmo.

*Erm.* E cosse te vorevet del Guglielmo?

*Enr.* Voreva.... voreva che l'andass a visà la mia amisa Giovannina che sont rivada.

*Erm.* (Che penser.... In jer la s'è inquiettada quand ghe vòsaven adree...) (*va davanti alla scrivania di Carlo*) Ch'el disa, sur Carlo, dopo

tutt voraria sperà che lu el sia on galantom.... el m'ha capii, èh? (*a Enrichetta*) Ti ven de là (*via*).

*Enr.* (Nanca a morì quell'alter el spòsi!) (*via*).

## SCENA XII.

**Carlo, indi Steven e Robert con un Notajo.**

*Car. (colpito dalle ultime parole di Erminia)*  
On alter insult! Sperà che dopo tutt mi sia on galatomm.... Ma me tocca propri sentinn de tutt' i color! Come se fa a resist.... Oh s'el fuss minga per la mia povera sorella! Ma l'è domà per mia sorella? Mia sorella.... ma e lee.... la m'ha ditt «cattiv!» Ma donca mi ghe sont minga indifferent.... Ma, pover diavol, cosa te penset mai adess: i consolazion del mond hin minga per ti (*siede lasciando cadere la testa fra le mani*).

*Ste. (entrando seguito da Roberto e dal Notajo)*  
E insci, l'ha leggiuu sto contratt?

*Car. (si alza con impeto e glielo consegna)* Sì, e hoo trovaa nient de correg!

*Ste.* Donca allora el ved che quand vuj mettom sont bon anca mi de scriv. Nèh, Robert, ch'el vaga a digh al sur Cavalier, a la sura Er-

68

SCRITTURA DOPPIA

minia e a la sura Enrichetta che gh'è chi el Nodar. Lu Robert e lu Carlo faran de testimoni (*al Notajo*) Ch'el se comoda, sur Dottor. Ma, Carlo, ch'el ghe daga on scagn de comodass.

*Car. (con motto mal represso gli dà una sedia)*  
Ch'el se comoda.

*Ste.* Sur Nodar, ghe presenti el sur Carlo Gualdi, on giovin pien de talent (*con ironia*) ma poch positiv, però, per la carriera commercial.... Ma adess che entri mi in sta casa, ghe faroo vedè.... (la porta) come se fa a sta in commercio.... (*guardando verso la porta*) Ecco chi tutt' i part interessaa.

## SCENA XIII.

**Onori, Erminia, Enrichetta, Robert e detti.**

*Ono.* Ecco, semm chi tucc.

*Ste. (accennando la scrivania di Carlo)* Ecco, sur Nodar, ch'el se metta chi (*tutti siedono meno Carlo e Roberto*).

*Enr.* (Oh se podess sperà ch'el me voeur ben!)

*Not.* Donca i testimoni hin....

*Rob.* Roberto Termini, che sont mi.

*Ste.* E Carlo Gualdi (*accennando Carlo*) che l'è lu.

*Not.* Se permetten, doo lettura del contratt. Lu, sur Rampini, el pò tegnì l'original che g'hoo mandaa indree, insci el vedarà in dove gh'è i correzion che me sont permettuu de fa; correzion de forma, se intend, minga de sostanza.

*Ste.* (Anca el Nodar el me correg!)

*Not. (leggendo)* « Regnando, ecc., ecc., addi, ecc., « allo scopo di costituire una Società.... » (*a Rampini*) Lu l'aveva scritt *costruire*. Donca: « allo scopo di costituire una Società per la « fabbricazione del sapone, i signori Cav. Gioa- « chino Onori e Stefano Rampini addivengono « ai seguenti patti: — Resta convenuto che la « signorina Enrichetta Onori accetta che la sua « dote, derivante da un legato materno consi- « stente in un Certificato del Debito Pubblico « Italiano, a lei intestato, per la rendita di « quindici mila lire, venga realizzato, e che la « somma venga impiegata per ampliare l'a- « zienda del padre Cav. Gioachino Onori, per « la fabbricazione del sapone; nella quale « azienda entrerà il signor Stefano Rampini, « che prenderà la direzione degli affari. Il si- « gnor Stefano Rampini prende per moglie la « signorina Enrichetta Onori, assegnandogli « una controdote di centomila lire assicurata « sopra i propri beni immobili. »

*Car. (che avrà dato non pochi segni di sofferenza durante la lettura)* (Ma no, l'è minga possibil che resta in sta casa, vesin a lee miee d'on alter!)

*Enr. (che avrà osservato Carlo)* (Pover Carlo, ma perchè l'è vegnuu insci smort? Ch'el me voress ben, forsi?)

*Not.* Sciori, adess passem a la firma.

*Car.* Che scusen, ma siccome che mi hoo fissaa de licenziamm dall'impiegh che occupi in sta casa, l'è inutil che mi faga de testimoni in sta faccenda chi.

*Tutti (meno Enrichetta)* Oh!

*Enr.* (El mè coeur el m'ha minga ingannaa...  
Sì, el me voeur ben!)

*Tutti (si alzano meno il Notajo).*

*Ono.* Ch'el se figura, el pò andà via anca subit  
(Figuremes, nient de mej per mi!)

*Ste.* Che disgrazia a perd on personal stordii  
compagn de lu!

*Car. (con impeto)* Adess l'è passaa el temp di  
maltrattament.... (a Rampini) Mi e lu quanto  
prima g'avaremm di cunt de giusta! (dà uno  
sguardo a Enrichetta poi esce).

*Ono.* Aveva impiegaa on bell mobil!

*Ste.* Ben, ben, tiremm el fiaa che semm disfe-  
sciaa (suona il campanello).

## SCENA XIV.

*Guglielmo e detti, meno Carlo.*

*Gug.* Comandi!

*Ste.* Sto servitor el pò fa de testimoni?

*Ono.* Mi credi.

*Not.* Alterchè!

*Ste.* Allora andemm, passemm a la firma.

*Not.* Donca, prima la sura Enrichetta.

*Enr.* (si avanza verso il tavolo, prende la penna,  
esita a firmare, poi pare si decida).

*Ste.* (vedendola decisa, si frega le mani).

*Ono. e Erm.* (si mostrano soddisfatti).

*Enr.* (che avrà osservato tutto ciò, gettando la  
penna) Mi giuri che sto contratt el firmaroo  
no a qualunque costo! (si ritira risolutamente).

*Tutti* Oh!!

*Quadro di sorpresa.*

FINE DELL' ATTO TERZO.

## ATTO QUARTO

La scena rappresenta una camera in casa di Carlo, come nell'atto primo.

SCENA PRIMA.

**Teresa e Carmelina.**

*Carm. (a Teresa che sta lavorando)* Ma l'è propri vera che l'è on poo de di ch'el Carlin l'è insci de cattiv umor; pover fioeu, mi credi ch'el g'abbia minga tutt' i tort. Oh chissà come i e dev mandà giò gross cont quella sort de gent ch'el dev obbedi! Oh s'el savess poeu el perchè quell sur Cavalier di mè sciavatt el g'aveva daa l'impiegh...

*Ter.* Per caritaa che ghe le disa minga.... el restaria tropp mortificaa!

*Carm.* No, no, chè mi sont bonna de tegnì la lengua a post.

*Ter.* Sura Carmelina, la ved come l'è mai cattiv el mond, eh?

*Carm.* Ma!

*Ter.* Ma forsi adess poeu, quell' omm là insci cattiv, el sarà bon magari de lassall in libertaa el mè Carlo.

*Carm.* Oh abbia minga paura che le farà no.

*Ter.* E se le fass?

*Carm.* Mi che hoo faa el maa, faroo la penitenza: sopportaroo mi i dann; finalment sont veggia, e del mè ben di Dio podi metten on poo a vostra disposizion senza paura de restà senza per i ultim ann che me resta de viv.

*Ter.* Ma, sura Carmelin, el Carlo l'accettarà minga la caritaa de lee, che l'ha giamò faa tanto per nun.

*Carm.* Ma che caritaa d'Egitt! (*gridando*) El sarà semper mej accetta di imprestit de mi, che restà impiegaa a certi condizion! Ma scusa se vòsi, ma già l'è el mè caratter....

*Ter.* Ma lee l'è la nostra santa protettrice, che la faga come la voeur lee.

*Carm.* Alterchè, che faroo come voeuri mi! Ma adess voo in cà a famm ona ressumada, e poeu voo a la Cassa a toeu quatter sold, insci a bon cunt.... (*via*).

## SCENA II.

Teresa, indi Carlo.

*Ter.* Ah sì, l'è propri cattiv el mond! Che brutta condizion l'è la nostra.... Ma, tutti quij che han bisogn de lavorà per mangià, han propri de mandaj giò insci gross com'el mè pover Carlo.... Ma i alter sarann minga in la condizion de fass tollerà come lu.... E incoeu hoo minga nancamò vist el mè Salvator.... el g'avarà avuu minga temp, pover diavol!

*Car.* (*entrando alquanto turbato*) L'era propri impossibil de podè resist!

*Ter.* Comè, ti Carlo, a st'ora chi? Ma, cosse te gh'ee che te see insci agitata? Cosse t'è succeduu?

*Car.* È succeduu che hoo poduu pù resist! (*va a sedere colla testa fra le mani*).

*Ter.* Ma, cara Madonna, ti te me spaventet! Ma, dimm, cosse l'è che te gh'ee?

*Car.* G'hoo che sont vegnuu via de studi. M'han faa perd la pazienza, e mi sont scappaa de quell maladetto sit.

*Ter.* Pover Carlo!

*Car.* Maladetto sit! Però, là per mi gh'era ona consolazion.... Ma perchè me sont lassaa trasportà, perchè hoo minga portaa pazienza.... avaria poduu vedella quand voreva mi.... Ah no, no, l'è mej che sia scappaa puttost de vedella miee d'on alter!

*Ter.* Ma, Carlo....

*Car.* Povera Teresa, se te savesset come sont infelice.... Ma, per Dio, l'è tropp!

*Ter.* Ma perchè?

*Car.* Perchè de st'altra mia disgrazia, l'è minga possibil che me poda consolà. Teresa, mi ghe vuj ben a ona tòsa....

*Ter.* E te ghe diset ona disgrazia a voregh ben a ona tòsa?

*Car.* Per mi sì.

*Ter.* Ma, Carlo, l'amor l'è minga forse el sentiment pussee nobil e pussee bell? L'è forse minga ona consolazion, tanto pù per quij che hin desfortunaa a sto mond?

*Car.* Ma quand el coeur el palpita senza speranza, l'è minga forse el pussee fort de tutti i dolor?

*Ter.* Ma se tratta forse d'on amor minga corrispost?

*Car.* Al contrari.... forse, ma se anca fuss corrispost, cessaria minga de vess infelice perchè g'hoo nient de sperà.



Ter. Nient de sperà?

Car. No, perchè quella che mi ghe vuj tanto ben l'è la tòsa del sur Onori, che de chi on poo de di la sarà miee d'on alter.

Ter. Car Signor!

Car. Dimm adess se l'è minga ona disgrazia! (pausa) Cattiv, la m'ha ditt.... Oh che effett la m'ha faa quella parola! Ecco, se mi me fuss trovaa in d'on'altra posizion, avaria poduu sperà.... Ma, la colpa l'è mia, donca l'è inutil che me lamenta. Oh che vita, che vita.... La vita?... Ma la vita però se pò fenilla e quand se voeur....

Ter. Ma, Carlo, cosse te diset, adess? Te me fee paura....

Car. No, no, stremizzet minga, povera Teresa, ma i dispiasè m'han ridott come matt (*siede nuovamente colla testa fra le mani*).

### SCENA III.

#### Salvatore e detti.

Sal. (*entrando con una lettera in mano si ferma sulla porta*) Teresa, la gh'è la guardia d'onôr?

Ter. Oh Salvator, el ven propri a temp!

Sal. (*vedendo Carlo*) Ma, coss'è succeduu, Carlo? in casa a st'ora chi?

Ter. G'han faa perd la pazienza e lu l'è vegnuu via.

Sal. Eh! mi me l'immaginava che l'avaria minga poduu resist! Ma, el motiv?

Car. (*con impeto*) L'è minga domà vun, hin tanti i motiv: eren minga assee i umiliazion che me toccava de subi per part de quell villan ignorant de quell sur Steven, el spòs de la tòsa del sur Cavalier, m'han finna accusaa de avè scritt ona lettera anonima e on articol de giornal, mettend in ridicol el sur Onori.

Sal. Ma chi l'è che avarà poduu inventà de sti robb?

Car. Quella carogna d'on mè compagn de studi, per vendicass de la scoperta che mi hoo faa che l'è on lader.

Sal. Ma se l'è per quest ghe rimediem subit.

Ter. Oh magari, ma l'è minga domà per quell.

Sal. Ma allora?

Car. Allora l'è impossibil che mi torna in quella cà!

Sal. Ma perchè impossibil?

Ter. Perchè el ghe voeur ben a la tòsa del sò principal, che la dev spòsann on alter.

Sal. Oh disgrazia!

*Car. (alterato)* Te sentet, Teresa, le dis anca lu che l'è ona disgrazia? ma ona disgrazia che mi saront bon de sopportà.... Bisogna che me faga coragg perchè adess devi anca trovà de mettem a post.... Ma trovaroo, poeu, o staroo ancamò on quai para d'ann senza savè in dove batt el còd? Oh ben, a la pù disperada soo ben cosse devi fa.

*Ter.* Oh ma Carlo!

*Sal.* Quiettet, te ghe n'ee semper avuu del coragg.... Guarda, sta sira ghe tornaroo a parlà al professor Belcredi.

*Car.* Ma intanta, come se farà a viv?

## SCENA IV.

## Carmelina e detti.

*Carm.* Come se fa a viv? v'el disi subit mi: cont ona part di mè risparmi; almen finna quand el trovarà on post pussee mej de quell ch'el g'aveva in del studi de quell'antipatigh biricchin d'on sur Cavalier, vonscisciaa d'oli e savon. Oh ma in stamattina g' hoo par-laa...

*Car.* Ma, in che manera l'ha faa?

*Carm.* In che manera hoo faa?

*Ter.* Sura Carmelina....

*Carm.* Ma che la lassa on poo ch'el disa....

*Sal.* Cosse l'è che la g'ha de di'?

*Car.* Sì, che la disa.

*Carm.* Deven donca savè che quell bell mobil d'on savonatt, che g'ha avuu la sfrontatezza de damm a mi de la veggia tapellona.... veggia tapellona a mi?... Già, scusee, l'è el mè caratter.... Oh sì, te avariet voruu, èh? che mi ghe fuss minga a tegnitt i oeucc adoss, brutt mobil!

*Ter.* Ma che la se scalda minga!

*Carm.* Già, l'è el mè caratter.... Adess hoo perduu el fil.... Anh! Donca deven savè che per avè impiegaa chi el Carlo, el voreva vess ricompensaa ma cont i fiocch.

*Car.* Ma in che manera?

*Carm.* El s'era lusingaa de vegh ona quai carezza chi de la brava Teresa.

*Car.* Oh!

*Sal.* Vece ballotta!

*Carm.* Avii capii i mè fioeu? Prima el s'è miss a vegni chi a fa el galante, e siccome che mi g'hoo faa ciappà el duu de copp, l'ha cambiaa vella: el s'è miss a mandagh di regaj; ma l'ultim regall ch'el g'ha mandaa ghe l' hoo portaa indree mi, ma cont ona romanzina....

E per famm tasè, perchè l'avess minga de senti la soa dolce metà, el me se metteva denanz in genoeucc. Donca, ch'el se tegna el sò impiegh e i sò regaj, che nun semm minga cosse fann! Ma vialter citto, che me sont vendicada mi assee.

*Car.* Ma....

*Carm.* Ch'el guarda che voo in collera, vedell! Teresa, andemm de là on moment in casa mia che faremm l'inventari di mè forz, e dopo derviremm el noster liber de dare e avere.

*Car.* No, mi el permettaroo mai!

*Carm.* Ohe, ohe! Ch'el pensa che la superbia l'è vun di sett peccaa mortai, e la superbia l'è stada quella che ha rovinaa anca Napoleon primm, come diseva el mè nonno che l'era staa in Russia; e se anca lu el g'avarà de la superbia, el finirà a trovas in Russia anca senza la fadiga de fa el viagg. Già, scusee, l'è el mè caratter.... Andemm, andemm, Teresa; ghe rincress, Salvator, che ghe la porta via?

*Sal.* No, ño, g'hoo de parlà chi cont el Carlo.

*Car.* Ghe giuri però, sura Carmelina, che....

*Carm.* Hoo ditt de finilla, nè vuj ringraziamment!

*Ter.* (dando un bacio a Carmelina) Ma lee l'è ona santa.

*Carm.* Oh quest sì ch'el ricevi volontera!

*Car.* (per darle un bacio) Allora vun anca mi.

*Carm.* (respingendolo) Alto là, lu l'è tropp bell e on basin soo minga che effett el podaria famm! (prende sotto braccio Teresa) Andemm, donca! (via con Teresa).

SCENA V.

Carlo e Salvatore.

*Car.* Te vedet, Salvator, come me capiten tucc?

*Sal.* El pàr impossibil, ma pur l'è vera.... Ma toeu, che l'è de quand sont vegnuu chi che g'hoo sta lettera de datt.

*Car.* (prende la lettera e la dissuggella) Firmada: «Un vostro amico.»

*Sal.* Ma e perchè gh'è minga el nomm?

*Car.* Oh! (corre ad aprire il cassetto del tavolino) In dove l'è el mè manoscritt? In dove l'è el mè liber?

*Sal.* (imbarazzato) Ecco... l'è che.... Insomma, el tò liber l'hoo presentaa al concurs, perchè me l'ha ditt quell professor....

*Car.* Oh Salvator, che brutta robba che t'eo faa! Tè, leg (gli dà la lettera).

Scrittura doppia.

G

*Sal. (leggendo)* « Signor Carlo. Vi avverto per  
« prepararvi al colpo che riceverete, che i  
« membri della Commissione che hanno letto  
« il vostro libro presentato al concorso, vi  
« hanno dichiarato un temerario, ridendo di  
« compassione per gli strafalcioni che vi ab-  
« bondano in quello scarabocchio... » E quell  
che ha scritt sta lettera chi el se firma on  
tò amis?

*Car.* Oh Salvator, ti t'ee abusaa de la mia  
amicizia.... Te dovevet mai esponem anca a  
famm diventà ridicol.

*Sal.* Ma mi a sta lettera ghe credi minga....  
Spetta, gh'è on poscritt: (*legge*) « Vi consi-  
« glio a ritirare il manoscritto prima che la  
« Commissione si raduni nuovamente per la  
« votazione, perchè così risparmiere a quei  
« signori una deliberazione non troppo lusinghiera a vostro riguardo. La Commissione  
« si raduna fra tre giorni. »

*Car.* Donca, ti che t'ee faa el mal te faree anca  
la penitenza: te ghe pensaree a andà a ritirà  
el liber, e subit.

*Sal.* Ma a mi m'aveven ditt che l'era on lavoro  
degn de vess presentaa al concurs.

*Car. (alzando la voce)* Sont mi giudes de quell  
che sont bon de fa!

*Sal.* Ma, eppur....

*Car. (c. s.)* Ma hoo ditt che te vaghet a riti-  
rall se de no te guardi pù in faccia, nè te  
diventaree pù nanca mè parent!

*Sal.* Ben, va minga in furia, andaroo a toeull,  
faroo quell che te voeu..... (*andando via*)  
Ma mi te giuri che hoo creduu de fa ben.  
(*via*).

SCENA VI.

*Carlo, indi Enrichetta, poi Carmelina.*

*Car.* No me mancava che de diventà ridicol...  
(*va al tavolo, prende tutti i fascicoli e li lacerà*) Ecco chi i mè pover penser, frut de  
tanti nott passaa senza dormì.... per vegh sto  
bell risultaa de famm rid adree. El saria staa  
mej che avess imparaa a fa el ferce, che in-  
coeu me trovaria minga avvilli in sta ma-  
nera.... E mi hoo creduu de vegh del talent!  
(*si leva l'abito, il colletto e rimbecca le maniche della camicia*) Sì, g'hoo on bell talent,  
appenna bon per fa el fattorin de piazza....  
per portà di fagott e de la mobiglia in spalla  
sont fort assee.... on quai post de mettem el

trovaroo in piazza.... *(si avvia risolutamente per uscire).*

*Enr. (si presenta sulla porta velata).*

*Car. (indietreggiando sorpreso)* L'è ona vision questa?!...

*Enr. (alzando il velo)* No, Carlo, sont mi.

*Car.* Enrichetta.... Ma l'è on sogn! Ma come la fa a vess vegnuda chi sola?

*Enr.* Sì, sola perchè hoo abbandona on casa in dove no predomina che la prepotenza e l'ignoranza.

*Car.* Oh Enrichetta, cosse l'ha mai faa!

*Enr.* G'hoo daa attrà a la vòs del mè coeur.... sont stada costretta da la disperazion. Se la mia madregha la m'avess voruu ben, l'avaria capii che l'era impossibil che mi toeujess per mari quell'ignorant d'on sur Steven. Ch'el guarda, Carlo *(alterata)* puttost saria capace de toeumm la vita!

*Car.* Ma per l'amor di Dio, sura Enrichetta, che la se calma.

*Enr.* Sì, me calmi.... Mi g'aveva bisogn d'on protettor ch'el me difendess, che avess de capi che mi vuj minga sposà el sur Steven; sto protettor el doveva vess mè pader, mè pader le voeur minga vess e mi sont scappada!

*Car.* E perchè l'ha pensaa de vegni de mi? L'ha minga calcolaa el pass che la fava?

*Enr.* (Ma, Dio mio, perchè el me parla insci? ch'el me voress minga ben?) Ma, Carlo, mi adess g'ho pù de parent....

*Car.* Ma cosse podi fa mi?

*Enr. (con slancio)* Tutt, perchè mi ghe vuj ben!

*Car. (con trasporto)* La me voeur ben?

*Enr.* Sì, e de tanto temp.... de quand me confortava, in di giornad de cattiv umor, leggend i sò racconti *(pausa).*

*Car. (lasciandosi cadere sopra una sedia)* Mi sont propri maledii del destin! Anca ona povera tòsa che se compromett per mi.... *(si alza e prende per una mano Enrichetta)* Ma, Enrichetta, che la me perdona ma anca mi ghe vuj ben, e l'è finna del primm di che l' hoo veduda.

*Enr.* Oh grazie, Carlo!

*Car. (riavendosi)* Oh pover insensaa, ma cosse hoo ditt mi adess? Che paroll hoo proferii?

*Enr.* I pussee sant per mi.

*Car.* No, no, Enrichetta, nun podem minga abandonass a di illusion....

*Enr.* Ma perchè?

*Car.* Mi sont pover e senza ona profession, e quindi l'è inutil ogni speranza.

*Enr.* L'è pover, senza ona profession? Ma cosse me ne importa! De chi a trii mès mi sont foeura de tutela e podaroo andà in possess de

quell che m'ha lassaa la mia povera mamma, e allora, Carlo, ghe mancarà pù nient: el g'avarà i mezzi de studià, de fass on bell nom, e mi saront orgogliosa de vess soa.

*Car.* Enrichetta, le sa quell là su come mi ghe vuj ben.... Gh'el giuri per la memoria de mia mader che lee l'è la prima tòsa che la m'ha faa batt el coeur d'amor; lee l'è el mè ideal che me consolava in di mè sogn: bella, santa, generosa.

*Enr.* (con trasporto) Oh Carlo, Carlo!

*Car.* Ma saria mi degn de la soa affezion, del sò amor, se accettass l'offerta che la me fa?

*Enr.* Ma chi l'è che podarà di' che l'è minga degn del mè amor? Sont mi sola che hoo de giudicà.

*Car.* No, perchè tutti podarann di' che in ringraziament de avemm impiegaa in del studi del sò papà, hoo approfittaa de la debolezza d'ona giovinetta senza esperienza per famm ona fortuna.

*Enr.* Ma mi saront pronta a giurà che l'è minga vera!

*Car.* El sarà minga assee per salvamm l'onor...  
(pausa) E quand tutti me disprezzarann, lee la sarà orgogliosa ancamò de vess mia?

*Enr.* Oh semper, semper! Andaremm via, andaremm de lontan, in coo del mond se farà

bisogn, in dove nissun savarann chi semm, e vivaremm felici in santa pàs.... Ma donca, Carlo, l'ha propri minga capii che mi ghe vuj tanto ben?....

*Car.* (lasciandosi trasportare, l'abbraccia) Ma Dio, concedimm de mori in sto moment chi!

*Enr.* (abbracciando Carlo) Oh no, Carlo, nun devom viv, viv per voress tanto ben! (stanno abbracciati).

*Carm.* (per entrare, si ferma di botto) Santa Maria Maddalena, la tòsa del savonatt!... Che bella idea!... (via senz'essere veduta).

*Car.* (ritornando in sè) Oh no, Enrichetta, bisogna che nun siem fort; mi a secondalla foo ona cattiva azion, e me premm tropp che me se creda on galantom.

*Enr.* (con risoluzione) Ebben, sì, el g'ha reson, Carlo! Mi torni via subit de sta casa, santuari de l'onestaa.... (guardandolo fisso) Carlo, lu ch'el me dimentica minga: mi voo a spettall in d'en sit in dove i dispiasè de sto mond poden minga rivà.

*Car.* (con terrore) Enrichetta, ma cosse l'è che voeur di'?

## SCENA VIII.

Teresa e detti.

*Car. (vedendo entrare Teresa)* Ah Teresa, te vegnet a temp!

*Ter.* Mi? (Capissi perchè la sura Carmelina la m'ha mandaa chi!)

*Car. (con decisione)* Teresa, ti te faree ona bonna azion: te compagnarèe la sura Enrichetta a casa soa; el sò papà che l'ha tentaa de disonoramm, el vedarà come se fa a rispettà l'onor di famili.

*Enr.* S' el voeur inscì obbediroo, ma el vedarà che i dispasè che voo incontra, me lassarann viv minga tant.

*Car.* No, lee la dev viv.... Che la se piega no a la volontaa de sò pader; che la sposa minga quell'omm indegn de lee, e mi ghe giuri che quand me saront faa ona posizion in societaa vegnaroo a offrighele.

*Enr.* Oh grazie, e sont sicura ch'el sarà prest... obbedissi! (*a Teresa*) Mia bonna sorella, andemm (*per avviarsi*).

## SCENA IX.

Onori, Erminia, Steven e detti, indi Carmelina.

*Ono. (entrando seguito dai suddetti)* Brutta biricchina, te ghe n'avevet pù de famm?

*Erm.* Questa l'è la ricompensa del tanto ben che t'hoo faa, tegnendet loeugh de mader?

*Ste.* Scappà de mi, quasi sò mari!

*Ono. (a Carlo)* A lu poeu ghe foo i mè compliment; bella azion che l'ha faa, a profittà d'ona testa esaltada per tirà l'acqua al sò molin!

*Ste.* Sì, ma nun tiraremm su i incaster e l'acqua l'andarà d'on'altra part.

*Car. (a Onori)* E mi invece ghe domandi a lu chi l'è de nun duu che ha agii pussee onestament.

*Erm.* Ma se pò sentinn de pesg!

*Enr.* Deven savè tutti che mi sont vegnuda chi de mia volontaa, perchè ghe vuj ben e perchè m'è odiòs el matrimoni che me vorii fa fà!

*Ste.* Oh!

*Enr.* Però, per el pass che hoo faa, te ciami perdon, papà.

*Ste.* E a mi?

*Enr.* A lu? Ma cosse ghe n'importa?

*Ste.* Me n'importa, perchè la sarà la prima subordinazion del noster matrimoni.

*Enr.* Che succedarà mai!

*Ste.* Ma mi g'hoo la promessa de sò pader, che l'ha semper mantegnuu la parola in di sò contratt.

*Enr.* Fortuna di Dio che mi sont minga ona robba de contrattà.

*Erm.* Tornemm a casa nostra, in dove sperì ghe se mettarà el coo on poo pussee a partii.

*Carm.* (fermandosi sulla porta fingendo di parlare colla gente di fuori) Oh malarbetti curiosi, come hin indiscreti! Ghe fa bisogn de sonà campann e martell? Invece l'è minga vera che la tòsa del sur Cavalier l'è scappada; l'è vegnuda chi perchè el sò papà l'è content che la spòsa el noster bravo Carlo! (fingendo di chiudere la porta in faccia a gente che sia al di fuori) Curiosi!

*Ono.* Brutta veggia stria, sont content nient del tutt!

*Erm.* Che sfrontatezza!

*Car. e Ter.* (a Carmelina) Ma!?

*Carm.* (piano) Citto, citto, che hoo faa apposta.

*Ste.* Mi reclami i mè diritti.

*Carm.* (piano a Onori) S'el dis de no, spifferi corum populus tutt' i sò peccaa; g'hoo chi la lettera...

### SCENA ULTIMA.

### Salvatore e detti.

*Sal.* (con una carta in mano) Carlo, quella lettera l'era falsa: el tò liber l'è staa premiaa.

*Ter., Car. e Enr.* (con gioia) Premiaa?

*Sal.* Ma comè, tutta la famiglia Onori chi? Oh a proposit: la lettera falsa l'era de quell Robert, giovin de studi de chi lu (accennando Onori) Quell che ha scritt la lettera anonima al sur Steven e l'articol sul giornal.

*Ono.* Possibil?

*Sal.* Ch'el ghe dimanda al sò servitor.

*Carm.* (piano a Onori) Sicchè, spifferi o el consent?

*Ono.* Sur Carlo, ghe foo i mè congratulazion. Che lu el fuss on giovin de merit, ne hoo mai dubitaa....

*Erm.* Ma cosse senti mi adess?

*Ste.* Caro socio, mi rinunzi ai mè diritti; vuj pù diventà la metaa de la soa tòsa. Però,



mandi a mont la nostra societaa, e in vintiquattr'ôr vuj indree i cinquanta mila lir che g'hoo imprestaa trii mès fa. Oh cont duserent mila lir al sò el sarà minga difficil trovà ona tòsa che la se innamorarà minga di spiantaa.

*Car.* Sur Steven, disi!

*Enr.* Papà, te doo metaa de quell che m'ha lassaa la povera mamma se te me lasset spòsà el mè Carlo.

*Ono.* Ma, cara la mia tòsa...

*Carm.* (piano a Onori) Ch'el guarda che spifferi...

*Ono.* (a Enrichetta) Ben sì, te contentaroo.

*Erm.* Comè, ma mi...

*Ono.* Cara la mia donna, sont mi el padron.

*Ste.* Ma va benone! Ma mi el mè cappell el metti in coo e minga come lu (a Carlo) che le taccerà sul primm ciod ch'el troverà in cà del sur Cavalier (via).

*Car.* (per inseguirlo) Villan!

*Enr.* (trattenendolo) Carlo!

*Car.* (a Enrichetta) L'ha sentii? Tutta la gent la diria insci.... (a Onori) Sur Cavalier, mi tornaroo impiegaa in la soa casa, e quand saront diventaa util e bon de sta in commercio, allora ghe dimandaroo la soa tòsa per miee.

*Ono.* (stringendogli la mano) Sì, e poeu el faroo anca mè socio.

*Car.* (a Teresa) Teresa, i danee del premi del mè liber sarann per la toa dota; va ben, Salvator? insci ve sposarii prest.... (sospirando) Mi d'ora innanz dovaroo dedicamm tutt al commercio, che ai temp che semm l'è la scienza di numer che trionfa, la scrittura doppia perchè chi se mettes in coo de fa on quaicoss d'alter, el restaria semper on pover diavol!

FINE DELLA COMMEDIA.

# REPERTORIO DEL TEATRO MILANESE

A CENT. 33 AL NUMERO

## Fascicoli pubblicati:

- FASC. 1 *El zio scior*, commedia in 3 atti di C. Cima.  
 » 2 *On nivolon d'estaa*, comm. in 3 atti di G. Bonzanini.  
 » 3 *On prèt scapuso*, commedia in 4 atti di C. Cima.  
 » 4 *Ona notizia falsa*, comm. in 2 atti di G. Duroni.  
 » 5 *El Togn fachin*, comm. in 4 atti di G. Bonzanini.  
 » 6 *I fœugh artificiaj*, commedia in un atto di Giovanni Duroni. — *Quarantott'or*, commedia in un atto di Camillo Cima.  
 » 7 *I duu matrimoni*, comm. in 4 atti di C. Tanzi.  
 » 8 *El vuj mi*, commedia in 2 atti di Giacomo Bonzanini. — *El di de S. Giorg*, farsa concoro e balabile, dello stesso.  
 » 9 *I duu tabar*, comm. in 3 atti di C. Cima.  
 » 10 *I tri C e i tri D del bon gener*, commedia in 4 atti di Cletto Arrighi.  
 » 11 *La donzella de cà Bellotta*, commedia in 5 atti di Camillo Cima.  
 » 12 *El Barchett de Vaver*, commedia in 3 atti di C. Cima.  
 » 13 *I Fanagottoni*, comm. in 4 atti di Camillo Cima.  
 » 14 *L'arcobaleno in d'on cumò*, scene domestiche in un atto di G. Duroni. — *Pader, Ficeu e Stevenin*, comm. in un atto dello stesso.  
 » 15 *El sbali d'ona tōsa*, comm. in 4 atti di G. Duroni.  
 » 16 *La mal maridada e la pesg imbattuda*, commedia in 4 atti di Giovanni Duroni.  
 » 17 *La festa de Sant Luguzzon*, commedia in 3 atti di Camillo Cima.  
 » 18 *Ona povera famiglia*, comm. in 4 atti di G. Duroni.  
 » 19 *Ona scena del 1847*, commedia in 4 atti di Giacomo Bonzanini.  
 » 20 *On' ora in stamparia*, comm. in 2 atti di C. Cima. — *I deslipp del sur Bartolamee*, di G. Duroni.  
 » 21-22 *El Barchett de Boffalora*, commedia in 4 atti di Cletto Arrighi. (Fascicolo doppio Cent. 70).  
 » 23 *La caritaa pelosa*, commedia in 2 atti di G. Duroni.  
 » 24 *Vun chs vè e l'alter che ven*, comm. in un atto di E. Ferravilla. — *La vendetta d'ona serva*, farsa in un atto dello stesso

17020

www.internetculturale.it

- FASC. 25 *Martin Bonstomegh*, comm. in 5 atti, dei signori C. Di Monterenzo, G. Duroni e G. Bonzanini.
- » 26 *Debit no paga debit*, ossia *la Camorra di Poveritt*, commedia in 3 atti di F. Villani.
  - » 27 *El mercena de Saronn*, comm. in 3 atti di C. Cima.
  - » 28 *La Lusietta de Sest Calend*, commedia in tre atti di Camillo Cima.
  - » 29 *Stevenin a Colmegna*, commedia in un atto di Giovanni Duroni. — *On dolor de coo*, dramma in un atto dello stesso.
  - » 30 *I Barbellati*, commedia in tre atti di Camillo Cima.
  - » 31 *El sciopero di madamin*, commedia in 2 atti di G. Duroni.
  - » 32 *Stringh e Bindej*, comm. in 3 atti di C. Cima.
  - » 33 *La statoa del sur Incioda*, commedia in un atto di Ferdinando Fontana.
  - » 34 *La dota d'on ceregh*, comm. in tre atti di G. Duroni.
  - » 35 *Chi le fa l'aspetta*, farsa di Eugenio Fattorini -- *On fanatici per Verdi*, farsa dello stesso.
  - » 36 *I duu Cusin*, dramma in 5 atti di G. Bonzanini.
  - » 37 *La Pina madamin*, commedia in due atti di Ferdinando Fontana.
  - » 38 *I Cartolinn postaj*, comm. in 2 atti di V. Ottolini.
  - » 39 *On Episodi di cinq giornad, el 20 Mars 1848*, commedia in un atto di Gaetano Sbodio.
  - » 40 *La mamma di gatt*, commedia in 3 atti di G. Sbodio.
  - » 41 *On spòs sequestraa*, commedia in un atto di Antonio Dassi. — *On episodi di cinq giornad, El 21 Mars 1848*, comm. in un atto dello stesso.
  - » 42 *Gaitan el Lana*, commedia in due atti di A. Dassi.
  - » 43 *No gh'e rosa senza spin*, comm. in 2 atti di A. Dassi.
  - » 44 *La Collana della Mamin*, commedia in tre atti di Gaetano Sbodio.
  - » 45 *I Gabboloni*, commedia in 2 atti di Gaetano Sbodio.
  - » 46 *El sur Pedrin in quarella*, commedia in quattro atti di Edoardo Ferravilla.
  - » 47 *La fera de S. Giovann*, vaudeville in due atti di Antonio Dassi. — *La fera de S. Giovann*, vaudeville in un atto dello stesso.
  - » 48 *On ricatt a Milan*, comm. in 2 atti di V. Ottolini.
  - » 49 *El Santin ballarin*, comm. in 3 atti di G. Duroni.
  - » 50 *A la Cassina di Pomm*, commedia brillante in 3 atti di Gaetano Sbodio.

Si spedisce franco dietro l'importo in vaglia Postale intestato all'Editore **Carlo Barbini**, Milano, via Chiaravalle, 9.

## Ultime pubblicazioni

- FASC. 51 *Amor de Mader*, commedia in 2 atti di A. Dassi.
- » 52 *On milanese in mar*, vaudeville in un atto di Cletto Arrighi.
  - » 53 *On'improvvisada*, scherzo comico in un atto di A. Dassi. — *L'apparenza l'inganna*, commediola in un atto di Eugenio Fattorini.
  - » 54 *I difett del sur Tapa*, comm. in 2 atti di E. Ferravilla.
  - » 55 *El 18 mars 1848*, comm. in un atto di C. Arrighi.
  - » 56 *Offelles fa el sò mestee*, commedia in due atti di Giuseppe Volonté.
  - » 57 *Nodar e Perucchee*, comm. in 3 atti di C. Arrighi.
  - » 58 *El suicidi*, commedia-parodia di P. Falconi. — *El capott*, scherzo comico in un atto di G. Bonzanini.
  - » 59 *On di de Natal*, dramma in un atto di C. Arrighi.
  - » 60 *Dopo trii ann*, dramma in un atto di A. Dassi. — *I malizi d'ona serra*, scherzo comico in un atto di Eugenia Malinverni.
  - » 61 *Ona man lava l'altra e tutt e dò laven la faccia*, commedia in tre atti di Filippo Villani.
  - » 62 *El cappell d'on Cappellon*, farsa in un atto di C. Arrighi.
  - » 63 *On sord e ona sorda*, farsa in un atto di C. Arrighi. — *El casto Giuseppe*, farsa in un atto dello stesso.
  - » 64 *Dal tecc a la cantina*, comm. in 3 atti di C. Arrighi.
  - » 65 *La gent de servizzi*, comm. in 4 atti di C. Arrighi.
  - » 66 *L'idea della famiglia*, comm. in un atto di C. Arrighi. — *La mej maniera de lassà la moròsa*, comm. in un atto dello stesso.
  - » 67 *El Giovanin de S. Cristofen*, comm. in 2 atti di Valerio Busnelli. — *Oh! i nervi* comm. in un atto di Enrichetta Oldani.
  - » 68 *On prêt che sent de vess omm*, comm. in 4 atti di Cletto Arrighi.
  - » 69 *La sura Palmira Spòsa*, comm. in 5 atti per C. Arrighi.
  - » 70 *On riplegh de nevòd*, comm. in tre atti trascritta da C. Arrighi.
  - » 71 *Miee che secca? Mari che pecca!* farsa in un atto di C. Arrighi. *El Milanese in l'Isola* (Seg. del *Milanes in Mar*) da un vaudev. ital. dello stesso.
  - » 72 *Carlambreus de Montesell*, commedia in due atti rifatta da Cletto Arrighi.
  - » 73 *L'amor vecc el ven mai freco*, commedia di carattere in 4 atti per Cletto Arrighi.
  - » 74 *I duu ors*, vaudeville di E. Giraud. — *La coccin del can*, vaudeville dello stesso.
  - » 75 *I consequenz d'on qui pro quo*, comm. in 2 atti di Eugenio Fattorini. *El matrimoni del sur M.P.* scherzo comico in un atto dello stesso.

- FASC. 76 *Qui pro quo*, commedia in un atto di E. Giraud.  
 » 77 *Teresa*, ossia *Divorzi o duell*, comm. in 4 atti di Cletto Arrighi.  
 » 78 *Ah, maledetta!* scherzo comico in un atto di Carlo Monteggia. — *El sur zio* — *Pin*, *Cecchine Zeffrin*, commedie in un atto dello stesso.  
 » 79 *On secrista in di pettol*, vaudeville di E. Giraud.  
 » 80 *Luis Beretta* (seguito del dramma *El 18 Mars 1848*) scene in un atto di E. Giraud. — *La mosca*, operetta cinese dello stesso.  
 » 81 *El sur Pedrin in cosorizion*, commedia in 4 atti di Antonio Dassi, (continuazione del *Nodar e Perucchee* e *Pedrin in quarella*).  
 » 82 *Amor e affari*, commedia in 4 atti di C. Arrighi.  
 » 83 *La Margheritin della Cagnoeula*, comm. in 3 atti di Antonio Dassi. — *On di de Santa Rosa*, scene domestiche dello stesso.  
 » 84 *Moschin, Vairon e Comp.*, commedia in 3 atti di E. Giraud.  
 » 85 *L'amor che scappa*, comm. in 2 atti di C. Arrighi.  
 » 86 *On sabet grass*, vaudeville per C. Arrighi. — *On garofol de cingfoeuj*, comm. in un atto dello stesso.  
 » 87 *On minivter in erba*, comm. in 2 atti di C. Arrighi.  
 » 88 *El prestide Barlassina*, comm. in 3 atti di C. Arrighi.  
 » 89 *La sura Santorenzi*, comm. in 3 atti di C. Arrighi.  
 » 90 *El randuca de Gerolstein*, commedia in 3 atti di C. Arrighi. — *On ball in maschera*, parodia in un atto dello stesso.  
 » 91 *On matrimoni per procura*, commedia in due atti di Cletto Arrighi. — *El sur Fonsin*, commedia in un atto dello stesso.  
 » 92 *La Fiorista*, commedia originale in 4 atti, di Giacomo Bonzanini.  
 » 93 *La vendetta d'on Cugnaa*, Comm. in 2 atti di A. Dassi. — *La ghitarra de Stradivari*, farsa in un atto di Duroni e Giraud.  
 » 94 *On scavezzacoll*, commedia in 2 atti di G. Tradico.  
 » 95 *I scoeul de ball*, comm. in 3 atti di Edoardo Mendel.  
 » 96 *On panattonin*, comm. orig. in 2 atti di C. Cima.  
 » 97 *Carlo Porta e i so poesij*, scene dell'epoca in 3 atti di Teodoro Anselmi.  
 » 98 *Leggerezza!*... scherzo comico in un atto di Leo Veleitá. — *El 6 febrar 1853* bozzetto drammatico in 2 quadri di Teodoro Anselmi.  
 » 99 *On lumin lontan lontan*, comm. in 4 atti di C. Cima.  
 » 100 *Chi sprezza ama*, comm. in 2 atti di G. Duroni.  
 » 101 *El garibaldin*, Idillio in un atto di E. Giraud.  
 » 102 *I saltador*, vaudeville in 2 atti di E. Giraud.

Si spedisce franco dietro l'importo in vaglia postale, intestato all'Editore **Carlo Barbini**, Milano via Chiaravalle, N. 9